

ԴԱՎԻԹ ԳՅՈՒՐՋԻՆՅԱՆ  
ՆԱՐԻՆԵ ՀԵԲԵՔՅԱՆ

# ՄԱՅՐԵՆԻ

Վաճառքի ենթակա չէ:

# 4

Մաս 1



ԴԱՎԻԹ ԳՅՈՒՐՋԻՆՅԱՆ, ՆԱՐԻՆԵ ՀԵՔԵՔՅԱՆ

# ՄԱՅՐԵՆԻ

Երրորդ, վերամշակված  
հրատարակություն

# 4

Մաս 1



Նկարիչ՝ Սուսաննա Այվազյան



Երևան 2019

# Հաստատված Է ՀՀ կրթության և գիտության նախարարության կողմից

ՀՏԴ 373.167.1: 809.198.1 (075.3)  
ԳՄԴ 81.2 < Գ72  
Գ 697

Գյուրջինյան Դ., Հեքեքյան Ս.  
Գ 697 Մայրենի 4: Մաս 1: Հանրակրթական դպրոցի դասագիրք (երրորդ, վերամշակված հրատարակություն). -Եր.: Էդիթ Պրինտ, 2012.- 88 էջ:

ՀՏԴ 373.167.1: 809.198.1 (075.3)  
ԳՄԴ 81.2 < Գ72

ISBN 978-9939-52-549-5

© Գյուրջինյան Դավիթ, Հեքեքյան Սարինե, 2019 թ.  
© Էդիթ Պրինտ հրատարակչություն, Երևան 2019 թ.






**ՅՈԹ ՍՐԲՈՒԹ-ՅՈՒՆ**

Հայր դարերով սիրով է պահել  
 Յոթ թանկ սրբություն.  
 Հողը, պատիվը, շինարար ոգին,  
 Հավատը, լեզուն:  
 Սուրբ անուններ են եղել դարերով  
 Հայ ընտանիքը,  
 Եվ ամենից վեհ, ամենից լուսե  
 Մայր հայրենիքը:

*Սուրեն Մուրադյան*







# ԼՅՎ ԸՆԿԵՐԸ 1

(ըստ Աստվածաշնչի)

Մի անգամ Հիսուսն իր շուրջը հավաքված մարդկանց այսպիսի պատմություն պատմեց:


Մի մարդ ճամփա ելավ: Դա ոլորապտույտ և ամայի ճանապարհ էր, որի երկու կողմերում հսկայական ժայռեր էին վեր խոյանում: Ճանապարհը նաև վտանգավոր էր, որովհետև քարերի հետևում դարանակալում էին ավազակները:

Մարդը միայնակ էր ճամփորդում, քսակում էլ բավական շատ փող ուներ: Կարող էր կռահել, թե ի՞նչ պատահեց. ավազակները հարձակվեցին նրա վրա, խլեցին քսակը, ծեծեցին նրան, նույնիսկ գողացան հագուստը և փախան: Ճամփորդը վիրավոր ու արյունաքամ ընկած էր և չէր կարողանում տեղից շարժվել:

- Օգնություն, օգնություն, կանչում էր նա:

Քանի որ անմարդաբնակ վայր էր, ոչ ոք չլսեց նրան:

Հանկարծ վիրավորը մոտեցող ոտնաձայներ լսեց:



- Օգնություն,- կանչեց նա,- խնդրում եմ, օգնե՛ք ինձ:

Այն մարդը, որն իջնում էր ճանապարհով, լավ էր հագնված: Նա նայեց ճանապարհին ընկած խեղճ վիրավորին ու նկատեց արյունը: «Եթե ես մոտենամ և օգնեմ այս խեղճին,- մտածեց նա,- կարող եմ իմ շքեղ հագուստը փչացնել»: Այդ պատճառով էլ ձևացրեց, թե չի տեսել ընկածին, և արագ հեռացավ:

«Ես արյունաքամ կլինեմ», - մտածեց վիրավոր ճամփորդը:

Քիչ հետո կրկին ոտնաձայներ լսվեցին: Վիրավոր ճամփորդն ուժերը հավաքեց ու կանչեց.

- Օգնություն, օգնություն:

Անցորդը շտապում էր: Նա, իհարկե, լսեց օգնության կանչող վիրավորի ձայնն ու մի հայացք գցեց նրա վրա, սակայն գլուխն իսկույն շրջեց: «Եթե օգնեմ այս մարդուն, կուշանամ: Ձևացնեմ, իբր չլսեցի», - որոշեց նա ու քայլերն արագացնելով՝ շարունակեց ճանապարհը:

**ճամփորդ  
հայացք  
արյունաքամ  
ոչ որ  
իբր**

«Հիմա կմեռնեմ,- մտածեց խեղճ ճամփորդը:- Ոչ ոք օգնության ձեռք չի մեկնում ինձ»:



**Առած**  
*Հավերժ թևով կթռչի,  
մարդը՝ բարեկամով:  
Հայկական*

**Բառախաղ**  
Գութը գտավ գթառատին,  
Գթառատին գթասիրտ,  
Գլուխ գլխի տվին երկար  
Եվ անգութին ... գթացին:



**Բառերի գանձատուփ**

1. Շարքերից ընտրիր և կողք կողքի գրիր հոմանիշ բառերը:  
*հսկայական      անմարդաբնակ      շքեղ      ոլորապտույտ*  
*ծուռումուռ      ձոխ      խոշոր      ամայի*
2. Գրիր վտանգավոր և *հսկայական* բառերի հականիշները:
3. Մեկ բառով ինչպես կասես՝  
**ա)** օգնության ձեռք մեկնել,      **բ)** հայացք գցել:

4. **Ուտնաձայն** բառը բաղադրիչների՝ բաժանիր: Երկրորդ արմատով բարդ բառեր կազմիր:

5. **Հնթանալ, գնալ, լվանալ** բառերի արմատներով և **-ացք** ածանցով բառեր կազմիր **հայացք** բառի նմանությամբ:



### Հարցերի և առաջադրանքների արկղիկ

- Գրիր դեպքերի նկարագրությունը.  
ա) Մի մարդ ծամփա ելավ:  
բ) Նա միայնակ էր ծամփորդում, քսակում էլ շատ փող ուներ:  
գ) ..... և այլն:
- Նկարագրիր այն ճանապարհը, որով անցնում էր մարդը:
- Նկարագրիր այն երկու անցորդներին, որոնք չօգնեցին վիրավորին:
- Ինչպես կվարվեիր, եթե վիրավոր մարդը քո ճանապարհին ընկած լիներ:



### Պատմությունների զամբյուղ

- Մանուկների Աստվածաշնչից Հիսուսի մեկ ուրիշ պատմություն կարդա և պատմիր ընկերներին:
- «Բարսիլոս մարդու վերջը» վերնագրով շարադրություն՝ գրիր:



Տեքստի սկզբնամասում գտիր այն բառը, որ նշանակում է՝ թաքնվել՝ մեկի վրա հանկարծակի հարձակվելու համար:



### Դադարի պահ

**Քսակ** է կոչվում այն փոքրիկ տոպրակը, որի մեջ անցյալում փող էին պահում: Հիմա քսակի փոխարեն օգտագործում են



դ									կ
---	--	--	--	--	--	--	--	--	---





## ԼԱՎ ԸՆԿԵՐԸ 2

(ըստ Աստվածաշնչի)

Ճանապարհին անօգնական ընկած հուսահատ վիրավորը ծարավ էր, վերքերն էլ ցավում էին, իսկ արևն ավելի ու ավելի կիզիչ էր դառնում: Հանկարծ նա կրկին մոտեցող ձայն լսեց, բայց այս անգամ ոչ թե մարդու ոտնաձայներ, այլ ավանակի դոփյուններ:



Ճամփորդը շատ էր թուլացել, գրեթե ուժասպառ էր եղել: Նա փորձեց ձայն տալ, օգնության կանչել, բայց կարողացավ միայն հազիվ լսելի ձայնով շշնջալ.

- Օգնե՛ք ինձ, խնդրում եմ, օգնե՛ք ինձ:

Ավանակով ճամփորդող մարդը, որ օտարական էր, լսեց վիրավորի թույլ կանչը: Նա նայեց ճանապարհին ընկած մարդուն ու անմիջապես գուշակեց կատարվածը: «Խեղճ մարդ,- հուզված մտածեց նա,- ես կփորձեմ օգնել քեզ»:

Օտարականը հանեց իր պայուսակը, որի մեջ դեղորայք,

վիրակապ և ջուր կար: Նա խնամքով մաքրեց վիրավոր ճամփորդի վերքերն ու վիրակապեց, ջուր տվեց, որ խմի ու ծարավը հագեցնի, հետո զգուշությամբ նստեցրեց ավանակի վրա:



Բարի մարդը քայլում էր ավանակի կողքով՝ մի ձեռքով պահելով նրա վրա նստած վիրավորին: Շուտով հեռվում առկայծող լույսեր երևացին, և օտարականը թեթևացած շունչ քաշեց. արդեն մոտենում էին փոքրիկ

իջևանատանը: Նրանք շատ դանդաղ էին գնում, բայց փրկության հույսը ուժ էր տալիս նրանց: Վերջիվերջո տեղ հասան: Իջևանատերը դուրս վազեց՝ օտարականին օգնելու: Նրանք խեղճ ծամփորդին ներս տարան ու պառկեցրին մահճակալին: Վիրավորը, իհարկե, փող չուներ. չէ՛ որ նրան կողոպտել էին և ամբողջ փողը գողացել:

**անօգնական  
դեղորայք  
առկայծել  
իջևանատուն  
վերջիվերջո  
ծախսել**

- Ոչինչ,- իջևանատիրոջն ասաց օտարականը:- Ահա՛, վերցրո՛ւ այս փողը: Վաղը ես պետք է շարունակեմ ճանապարհս, բայց դու, խնդրում եմ, խնամիր նրան, մինչև որ լավանա: Եթե ավելին ծախսես, վերադարձիս ճանապարհին կվճարեմ աշխատանքիդ համար:

Պատմությունն ավարտելուց հետո Հիսուսն ասաց.

- Ընկերը նա է, ով քո սիրո և օգնության կարիքն ունի, ընկերը նա է, ով սիրում և օգնում է քեզ:

### **Ասացվածքներ**

*Ընկերոջը վտանգի մեջ են ձանաչում:  
Ճապոնական*

### **Իմաստախոսություն**

*Մարդիկ գոյություն ունեն  
մեկը մյուսի համար:*



Արեւի՛ Գիրունիկ,  
ասա՛, ինչդրո՞ւմ եմ, ի՞նչ  
է նշանակում **իզկանել**  
բառը:

Ինչուի՛կ զան, քեզ հեղա-  
փոփոդ բառը կապվել է  
**իզկան**-ից: Ասա նշանակում է «ճա-  
նապարհին կառուցված շինություն,  
որ նախատեսված է գիշերելու կամ  
հանգստանալու համար»: Այսինքն՝ **իզկանը**  
ժամանակակից հյուրանոցի նման բան էր:



Ուրեմն **իզկանել** բառն էլ  
կնշանակի «գիշերելու կամ  
հանգստանալու համար ճա-  
նապարհին որևէ տեղ կանգ առ-  
նել, մնալ»: Պարզ է, որ **իզկա-**  
**նապերն** էլ **իզկանի** տերն է:

Գիրե՛ճ, **իզկան**  
բառից է առաջացել  
Մնայուշի մարտի  
կենտրոնի՝ **իզկանի**  
անունը:





## Բառերի գանձատուփ

1. Գրի՛ր գուշակել, առկայծել, խնամել բառերի հոմանիշները:
2. Գրի՛ր մոտենալ, թուլանալ, ավարտել բառերի հականիշները:
3. Լավանալ բառն այս տեքստում ի՞նչ իմաստով է գործածվել:
4. Զուր և հույս արմատներով բառե՛ր կազմիր:



## Հարցերի և առաջադրանքների արկղիկ

1. Պատմությունը պատմի՛ր քո բառերով:
2. Օտարականն ինչպե՞ս օգնեց վիրավոր ճամփորդին:
3. Քո կարծիքով օտարականն ինչու՞ օգնեց վիրավորին:
4. Ո՞րն է այս պատմության հիմնական միտքը:



## Պատմությունների և զրույցների զամբյուղ

1. Որևէ մեկին երբևէ օգնել ես: Պատմի՛ր:
2. Պատմի՛ր քո ամենալավ ընկերոջ մասին:



## Լեզվաբանի դասը

Համեմատի՛ր լավ, լավություն և լավատես բառերը: Ի՞նչ նկատեցիր:

### Բառերի կազմությունը

Բառերն ըստ կազմության լինում են պարզ, բարդ և ածանցավոր:

Պարզ են միայն մեկ արմատից կազմված բառերը: Օրինակ՝ մարդ, տուն, սեղան, ներկ, գույն, բույս:

Բարդ են երկու և ավելի արմատներից կազմված բառերը: Օրինակ՝ տոմսարկղ, արևածաղիկ, վարդագույն, գրադարանավար:

Բարդ բառերի արմատները հաճախ միանում են ա հոդակապով: Օրինակ՝ ջրափոս, գայլաձուկ, վիրակապ:

Ածանցավոր են այն բառերը, որոնք կազմված են մեկ արմատից և մեկ կամ երկու ածանցից: Ածանցները արմատներին միանում են սկզբից կամ վերջից: Օրինակ՝ անվախ, ուրախություն:





Նաղեր Էբրահիմի

## ՈՒՄ ՆՎԻՐԵՄ ԻՄ ՓՈՔՐԻԿ ՍԻՐՏԸ



Ես մի փոքրիկ, շատ փոքրիկ, շատ-  
շատ փոքրիկ սիրտ ունեմ:

Տատիկա ասում է. «Սիրտը չպետք է  
դատարկ մնա: Դատարկ սիրտը դատարկ  
ծաղկամանի նման է և ցավ կարող է  
պատճառել մարդուն»:

Ահա թե ինչու երկար ժամանակ խորհում եմ,  
թե ո՛ւմ նվիրեմ իմ այս փոքրիկ սիրտը, ավելի ձիշտ՝  
ու՛մ տեղավորեմ սրտիս մեջ: Ինչպե՞ս ավելի ձիշտ բացատրեմ.  
ուզում եմ, որ իմ փոքրիկ սիրտը, որ գեղեցիկ ու կոկիկ տնակի  
նման մաքուր է, նվիրեմ մի մարդու, որին բոլորից շատ եմ սիրում:  
Նրան, ով իսկապես արժանի կլինի իմ այս փոքրիկ ու մաքուր  
տան մեջ **ապրելու**:

Ճիշտ եմ ասում, չէ՞:

Հայրիկա ասում է. «Մարդու սիրտը հյուրանոց չէ, որ գան,  
երկու-երեք ժամ կամ երկու-երեք օր ապրեն ու գնան»:

Իսկապես, չգիտեմ, թե ի՛նչ բան է սիրտը: Համոզված եմ, որ  
սիրտը բարի ու ազնիվ մարդկանց տեղն է, այն էլ՝ մշտական  
տեղը:

Այո... Լավ **մտածելուց** հետո որոշեցի, որ սիրտս ամբողջովին,  
անմնացորդ մայրիկիս եմ նվիրելու: Եվ այդպես էլ արեցի:

Երբ նայեցի, տեսա, որ թեև սիրելի մայրիկս հեշտ ու հանգիստ  
տեղավորվել էր, սակայն սրտիս կեսը դատարկ էր մնացել... Պարզ  
է. ես հենց սկզբից պետք է գլխի ընկնեի ու սիրտս միանգամից  
երկուսին՝ մայրիկիս ու հայրիկիս, նվիրեի: Այդպես էլ արեցի:

Հետո գիտե՞ք՝ ի՛նչ պատահեց. երբ նայեցի, տեսա, որ սրտումս  
դեռ ահագին տեղ է մնացել:



Եվ սրտիս դատարկ անկյունն անմի-  
ջապես նվիրեցի ինձ հարազատ, շատ  
հարազատ մի քանի հոգու՝ մեծ  
եղբորս, փոքր քրոջս, պապի-  
կիս ու տատիկիս, նաև իմ  
լավ ու բարի քեռուն  
ու հորեղբորը...

Մտածեցի՝ հիմա  
այնտեղ այ թե իրար-  
անցում կլինի... Այդ-  
քան մարդ ինչպես է տե-

ղավորվելու այդ փոքրիկ սրտում:

Աստված իմ, նայեմ ու ինչ տեսնեմ. նրանք բոլորը միասին  
սրտիս ընդամենը կեսն էին զբաղեցրել, ուղիղ կեսը: Հանգիստ  
տեղավորվել էին, զրուցում էին, ծիծաղում... Ինչ նեղվածք, ինչ  
բան... Սրտումս դեռ մի աշխարհ տեղ էր մնում...

«Լավ,- մտածում եմ,- հիմա ու՛մ հերթն է...»:

Եվ սրտիս դատարկ մնացած մասը սիրով նվիրեցի մեր  
թաղի բոլոր ազնիվ մարդկանց, իմ լավ ու բարի բարեկամներին  
ու հարազատներին, ընկերներին, ինչպես նաև այն բոլոր  
ուսուցիչներին, որոնք երեխաներին սիրում են ...

Մեր մեջ ասած՝ հայրիկս մի հարուստ հորեղբայր ունի, շատ  
հարուստ հորեղբայր: Մտածեցի. քանի որ բոլոր լավ մարդկանց  
տեղավորել եմ սրտիս մեջ, հորս հորեղբորն էլ մի անկյունում տեղ  
տամ: Բայց նա չտեղավորվեց: Ինչքան **չարչարվեցի**, անօգուտ:  
Բայց ես ինչ կարող էի անել: Ես մեղք չունեի: Մեղավորը հաստատ  
իևրն էր: Ասեմք, երբ ինքը մի կերպ ներս էր խցկվում, դրսում էին  
մնում նրա փողի հսկայական սնդուկները: Եվ նա հեկիև դուրս էր  
վազում փողի հետևից...

Կամաց-կամաց հասկանում էի, թե մի փոքրիկ, շատ փոքրիկ  
սիրտն իրականում որքան մեծ կարող է լինել...

Մի գիշեր, երբ վերհիշեցի մեծ պատերազմի ծանր ու դժվարին

օրերը, լաց եղա ու բարձրաձայն գոռացի.  
«Սրտիս մնացած մասը նվիրում եմ բոլոր այն  
հերոսներին, որոնք նենգ թշնամուն դուրս  
վնդեցին մեր հողից»:

Հրաշալի է:

Հիմա իմ սիրտը մեծ ու հսկա մի քաղաքի  
նման արդեն դպրոց ունի, հիվանդանոց,  
զորանոց, փողոցներ ու թաղեր...

Հիմա սրտումս ընդամենը մի շատ փոքրիկ  
տեղ է մնացել: Եվ գիտե՞ք, թե ու՛մ համար եմ պահել... Ճիշտ  
կռահեցիք. պահել եմ բոլոր չար ու վատ մարդկանց համար:  
Այո՛: Սակայն պայմանով, որ նրանք փոխվեն. երեխաներին  
չնեղացնեն, ծովերը չաղտոտեն, կենդանիներին չոչնչացնեն և  
առհասարակ ոչ մեկին վատություն չանեն... Միայն այդ դեպքում  
նրանք կդառնան իմ սրտի բնակիչները:

Այդպես է, չէ՞: «Անգամ եթե բոլոր այդ մարդիկ բարիանան ու  
սիրտս մտնեն,- մտածում եմ ես,- միևնույն է, սրտումս դեռ էլի մի քիչ  
տեղ կմնա... Գուցե անտառների համար, լեռների, թռչունների,  
ձկների, եղնիկների ու էլի շատ ու շատ բաների համար...»:

Իսկապես որ զարմանալի բան է. չեն հասկանում՝ սա սիրտ է,  
թե՞ անծայրածիր օվկիանոս...

Ախր այս փոքրիկ սիրտն ինչպե՞ս չի լցվում...

Գուցե հասկանամ, երբ մեծանամ: Բայց հիմա, քանի դեռ  
սրտումս տեղ կա, սիրտս պիտի նվիրեմ բոլոր-բոլոր լավ ու բարի  
մարդկանց: Սիրտը հենց դրա՛ համար է: Մի՞թե այդպես չէ...

*Պարսկերենից թարգմանեց Գևորգ Ասատրյանը*

## Իմաստախոսություններ

*Մեծ սիրտը, ինչպես օվկիանոսը, երբեք չի սառչում:*

*Մարդիկ ամենից շատ արժանի են սիրո:*

*Լավ մարդը միաժամանակ ապրում է հազար ու մի տեղ,  
հազարավոր սրտերում:*





## Բառերի գանձատուփ

1. Պատմվածքում գտիր **խորհել, գոչել, բնակվել, տանջվել, գուշակել, կեղտոտել** բառերի հոմանիշները (դրանք կապույտ են գրված):

2. Գրիր **ազնիվ, մշտական, դատարկ, մեղավոր** բառերի հականիշները:

3. **Հնալ** նշանակում է «ընդհատումներով արագ-արագ շնչել, շունչը կտրվել»: Ի՞նչ է նշանակում **հևիհև**:

4. **ա) Բարեկամ** նշանակում է՝ 1) «լավ, բարի վերաբերմունք ունեցող», 2) «ազգական», իսկ **հարազատ** նշանակում է՝ 1) «արյունակից, ազգական», 2) «մտերիմ, սիրելի, թանկագին»: Ո՞ր իմաստն է ընդհանուր:

**բ) Հարազատ** բառը դ՞ր իմաստով է գործածվել **Արտիս դատարկ անկյունը նվիրեցի ինձ հարազատ, շատ հարազատ մարդկանց** նախադասության մեջ: Փորձիր փոխարինել հոմանիշ բառով:

**գ) Հարազատ** բառով 2-3 բառակապակցություն՝ն կազմիր:

5. **Ծաղկաման** բառի արմատներից յուրաքանչյուրով 1-ական ածանցավոր և բարդ բա՛ռ կազմիր:

6. Թռչունների և ձկների երեքական անունով լրացրո՛ւ աղյուսակը:

թռչուն	ձուկ

Արեւի՛ Գիպունիկ, ճի՞շդ եմ հասկացել արդյո՞ք, որ **մի աշխարհ փեղ** արքայախյուրությունը նշանակում է «շար փեղ»:



Այո՛, այդպես է: Պրա՛նման մի ուրիշ արքայախյուրություն էլ եմ ավելացնեմ՝ **ծով համբերություն**, որ նշանակում է «շար մեծ, անասման համբերություն»:





## Հարցերի և առաջադրանքների արկղիկ

1. Հեղինակն ինչերի՞ հետ է համեմատում սիրտը: Դու՞ ինչի հետ կհամեմատեիր այն:
2. Թվարկիր, թե տղան իր սրտում ու՞մ տեղ տվեց:
3. Գրիր *հայր, մայր, հորեղբայր, հորաքույր, կին, ընկեր* բառերի ու՞մ հարցին պատասխանող ձևերը:  
Նմուշ՝ եղբայր – (ու՞մ) եղբոր:
4. *Տեսնել - տեսա, տեսար, տեսավ* շարքի նմանությամբ գրիր *մտնել* և *իջնել* բառերի շարքերը:
5. Ծարունակիր և նախադասություններ կազմիր.  
ա) *Իմ կարծիքով.....:*                      բ) *Համոզված եմ.....:*



## Պատմությունների և զրույցների զամբյուղ

1. Ո՞վ արդեն տեղ ունի, և ու՞մ կուզեիր տեղ տալ քո սրտում:
2. Պատրաստ ես սրտիդ մեջ չար և վատ մարդկանց էլ տեղ տալու: Ի՞նչ պայմանով տեղ կտաս նրանց:  
Լսիր նաև ընկերներիդ կարծիքը:



## Իմաստունի խորհուրդները

Արհի՛ր լու մտերիմներին ու հարապարներին: Իարգի՛ր ուրիշներին, որպեսչի նրանի էլ քեչ հարգեն:

Սուշարի՛ր և հոգարար եղի՛ր քեչ շրգարարող մարդկանչ նկարմար, օգնի՛ր նրանչ, ինչով կարող ես:

Սրիշների հեչ վարվի՛ր աչնպես, ինչպես կուչես, որ նրանի վարվեն քեչ հեչ:



## Դադարի պահ

Բառաշղթայից առանձնացրու՛ 1-ին, 2-րդ, 6-րդ, 7-րդ, 11-րդ, 15-րդ և 17-րդ տառերը և բա՛ռ կազմիր:

**ընկերտասակինպապիկքեռի**



### ՀԱՅՐԱ

Երբ դաշտերում Ծիրակի  
Առավոտն էր արթնանում,  
Մայրս ամեն կիրակի  
Ինձ մեր բոստանն էր տանում:

Հայրս մի գառ էր առել,  
Ճերմակ մի գառ ինձ համար,  
Ու ես մի թուխ գառ դարձել՝  
Խաղում էիք անդադար:

Երբ հայրիկս մեզ բռնում,  
Ինձ մի թևին էր առնում,  
Մյուս թևին՝ գառնուկիս,  
Կյանքս դրախտ էր դառնում:


Արածում էր գառնուկս  
Եվ դառնում էր ինձ պահակ,  
Երբ ես՝ հոգևած մանուկս,  
Քնում էի կաղնու տակ:

Հովն էլ անուշ մայրիկիս  
Նուշ համբույրն էր ինձ բերում,  
Թե՛ մորուքն էր հայրիկիս  
Ինձ քնած տեղս համբուրում:

Թիթեռների մեջ թիթեռ,  
Ծաղիկների մեջ՝ ծաղիկ,  
Ինչ անուշ էր կյանքս դեռ՝  
Անհոգ, լուսե, խաղաղիկ:



արթնանալ  
անդադար  
համբույր  
համբուրել



### Օրինանքներ

Հորով, մորով լինես:

Աստված պահի քեզ:

Ծլես, ծաղկես, զորանաս:







## Բառերի գանձատուփ

1. Հով նշանակում է «թեթև քամի, հովիկ» և «զով, սառը»: Բառը ո՞ր իմաստով է գործածվել բանաստեղծության մեջ:
2. Գրի՛ր մանուկ, անդադար, անուշ, ճերմակ բառերի հոմանիշները:
3. Գրի՛ր արթնանալ, տանել և հոգնել բառերի հականիշները:
4. ա) Համեմատի՛ր համբույր և համբուրել բառերը: Ի՞նչ նկատեցիր:
 

բ) Գույն, լույս, բույս արմատներին վերջից բաղադրիչներն ավելացրու և նոր բառեր կազմիր:
5. Գառնուկ և հայրիկ բառերից առանձնացրու՝ ածանցները: Դրանցով ուրիշ բառեր կազմիր:



## Հարցերի և առաջադրանքների արկղիկ

1. Քո բառերով պատմի՛ր բանաստեղծությունը:
2. Հեղինակն ի՞նչ բառերով է նկարագրում իր կյանքը մանուկ տարիներին:
3. Բանաստեղծն ի՞նչ էր զգում իր հոր կողքին:
4. ա) Կաղնի, կաղնու, կաղնուց ձևերի նմանությամբ գրի՛ր ուռենի, եղևնի, բալենի բառերի համապատասխան ձևերը:
 

բ) Որևէ շարքից երկու բան ընտրիր և գործածի՛ր նախադասությունների մեջ:



## Պատմությունների և զրույցների զամբյուղ

1. Պատմի՛ր քո կյանքի ամենաերջանիկ օրվա մասին:
2. Հայրիկիդ գրավոր պատմի՛ր քո ամենաթանկ երազանքի մասին:



Բանաստեղծության մեջ գրված է՝ Առավոտն է արթնանում:  
Մի՞թե այդպիսի բան հնարավոր է, դու ի՞նչ ես հասկանում:

## Լեզվաբանի դասը

### Բառի ուղիղ և փոխաբերական իմաստներ

Յուրաքանչյուր բառ իր իմաստն ունի: Օրինակ՝ **թռչել** նշանակում է «օդում թռնելը թափահարելով մի տեղից մի ուրիշ տեղ փոխադրվել»: Սա **թռչել** բառի սովորական կամ **ուղիղ** իմաստն է:

Խոսքում բառերը հաճախ գործածվում են ոչ սովորական իմաստով: Օրինակ՝ **ժամանակը շատ արագ է թռչում**: Ժամանակը թռչել չի կարող. ժամանակը կարող է շատ արագ անցնել: Ուրեմն **թռչել** բառն այս նախադասության մեջ գործածվել է «արագ անցնել» իմաստով, որը նրա ոչ սովորական՝ **փոխաբերական** իմաստն է:

Այդպես էլ **ոսկի** բառի ուղիղ իմաստն է «դեղին գույնի թանկարժեք մետաղ»: Օրինակ՝ **Ազահ մարդը ոսկի շատ էր սիրում**: Իսկ փոխաբերական իմաստը՝ «լավ, բարի, ազնիվ», օրինակ՝ **ոսկի բնավորություն, ոսկի մարդ**:



### Դադարի պահ

Բառաշարքից առանձնացրո՛ւ բառերը և ըստ գույների որոշիր, թե ինչը որտե՛ղ է աճում:



խաղողգազարցորենվարունգաալորգարիդեղձսոխծիրանպղպեղ կեռասվարսակդմիկտարեկանկաղամբընկույզլոբիխնծորբողկնուռ

արտ	այգի	բանջարանոց
-----	------	------------

## ՄՈՐ ԺՊԻՏԸ

Մայրական ժպիտ, դու քնքուշ ու լուռ  
Եվ փափուկ, ինչպես աղավառ փետուր,  
Դու երկնքի պես աստղալից ու խոր  
Եվ արևի պես տաք ու լուսավոր:

Ես օրորոցում քո շողն զգացի  
Եվ զանգակի պես ուրախ զնգացի,  
«Մայրիկ» կանչեցի մայրենի լեզվով,  
Եվ իմ աշխարհը սկսվեց քեզնով:

Իմ մանկությունից մնացել է ինձ,  
Մայր, քո ժպիտը լույսի պես թովիչ,  
Եվ բոժոժների զնգոցով նորից  
Քո երգը հավետ ուղեկցում է ինձ:

Ռուսերենից թարգմանեց  
Նանսեն Միքայելյանը

**օրորոց  
ուղեկցել**

## Ասույթներ

Մոր սիրտը մարդկության  
սիրտն է, տիեզերքի սիրտը:  
Ավ. Իսահակյան

Կա մի գեղեցիկ էակ, որին միշտ պարտք ենք. դա մայրն է:

Օստրովսկի (ռուս գրող)



## Հանելուկ

Այն զոր պահն է տվյալ օրվա,  
Երբ մայրիկն է քեզ օրորում,  
Տաք վերմակով քնքուշ ծածկում,  
Ջերմ համբույրով քեզ քուն բերում:



## Բառերի գանձատուփ

1. Բանաստեղծն ի՞նչ բառերով է բնութագրում մոր ժպիտը:
2. Համեմատիր **գեղեցիկ ժպիտ** և **լուսավոր ժպիտ** բառակապակցությունները: Ո՞ր բառն է գործածվել փոխաբերական իմաստով: Այդ բառի ուղիղ իմաստով բառակապակցություն՝ն կազմիր:
3. Գրիր **քնքուշ**, **լուռ**, **շող**, **ուրախ**, **հավետ** բառերի հոմանիշները, դրանք գործածիր առանձին նախադասությունների մեջ:
4. **Աստղազարդ** բառի հոմանիշը գտիր բանաստեղծության մեջ:
5. Ինչպիսին կարող ես լինել երկինքը, սիրտը. յուրաքանչյուրի կողքին համապատասխան բան դիր:  
Նմուշ՝ **ծով - ալեկոծ ծով, անծայրածիր ծով, փոթորկոտ ծով:**
6. **Թովիչ** բառի հոմանիշներն են **գրավիչ, հմայիչ, կախարդական** բառերը: Դրանցից մեկը գործածիր նախադասության մեջ:



## Հարցերի և առաջադրանքների արկղիկ

1. Բանաստեղծության մեջ մայրական ժպիտն ինչերի՞ հետ է համեմատվում: Իսկ դո՞ւ ինչի հետ կհամեմատեիր:
2. Ի՞նչ ես զգում, երբ մայրիկդ ժպտում է:
3. Բանաստեղծությունից **ինչպիսի՞** հարցին պատասխանող 5 բան դուրս գրիր և դրանցով բառակապակցություններ կազմիր:
4. **Աղավնի, աղավնու, աղավնուց** ձևերի նմանությամբ գրիր **որդի, այգի, ոսկի** բառերի համապատասխան ձևերը:



## Պատմությունների և զրույցների զամբյուղ

1. Նկարագրիր քո մայրիկին:
2. Ջերմ նամակ գրիր մայրիկիդ և նրան հաղորդիր այն, ինչը միևնույն հիմա բարձրաձայն չես ասել:



**Բոժոժ** բառն այստեղ նշանակում է «զանգակ, զանգուլակ»: Հետաքրքրվիր, թե ուրիշ ի՞նչ բոժոժ է լինում:





## ՄՈՐ ՆԱՄԱԿԸ

Որդի՛ս, ես **համոզված** եմ, որ քո ընկերները երբեք այնպես չեն պատասխանի իրենց հորը, ինչպես դու՝ այսօր երեկոյան:

Էներիկո, ինչպես կարողացար այդ անել:

Դու պետք է խոստանաս ինձ, որ այդ բանը երբեք չի կրկնվի:

Ամեն անգամ, երբ ի պատասխան հորդ արած **դիտողության**, մի կոպիտ բռռ է ուզում դուրս թռչել քո բերանից, խորհիր այն մասին, որ մի օր գղջալու ես դրա համար:

Հետո դու կհասկանաս, որ հայրդ միշտ ամենալավ ընկերն է եղել քեզ համար, ու երբ ստիպված է եղել պատժել քեզ, դրանից նա ավելի է տանջվել, քան դու ինքդ: Իսկ եթե երբեմն էլ քեզ **ստիպել** է լաց լինել, ապա քո բարին **կամենալով**:

Նա հաճախ է փնտրում քո մտերմությունը, որովհետև քեզ հետ է ուզում լինել այն պահերին, երբ սիրտը ծանրացած է, երբ անախորժություն է պատահում իրեն, ինչպես բոլոր մարդկանց. քո մեջ ընկեր է փնտրում, որպեսզի **սփոփվի** ու հոգսը մոռացության տա: Այդ ժամանակ նրան հարկավոր է քո սերը՝ հոգու պայծառությունն ու արիությունը վերագտնելու համար:

Մտածիր, թե ինչպիսի ցավ ես պատճառում նրան, երբ փոխադարձ սիրո փոխարեն նա քո մեջ տեսնում է անտարբերություն ու կոպտություն:

Այլևս նման **սուկալի երախտամոռություն** ցույց չտաս, որդի՛ս:

Մտածիր. որքան էլ ջանաս, միևնույն



է, չես կարող փոխհատուցել այն, ինչ նա արել է ու շարունակում է անել քեզ համար:

Գնա՛, տղաս, գնա՛ հորդ մոտ, նա կողքի սենյակում նստած աշխատում է: Ուտքերիդ ծայրերի վրա մոտեցիր նրան, որպեսզի չլսի ներս մտնելուդ ձայնը, գլուխդ դիր նրա ծնկներին ու ներողութուն խնդրիր:

Քո մայր

## Իմաստախոսություններ

Ծնողի խստությունը բուժիչ դեղ է. նրա մեջ ավելի շատ բաղդրություն կա, քան դառնություն:

Մոր սիրտը մի անդունդ է, որի խորքում միշտ էլ ներում կգտնվի:

## Առած

Խրատը դեղի նման է. որքան դառը, այնքան բուժիչ:



## Բառերի գանձատուփ

1. Նամակում գտիր **նկատողություն, հարկադրել, ցանկանալ, մխիթարվել, սարսափելի, վստահ, ապերախտություն** բառերի հոմանիշները. դրանք կապույտ են գրված:

2. Գրիր **երբեք, հաճախ, մոռացության տալ, մոտենալ, ծանրանալ** բառերի հականիշները:

3. Բաց թողնված տեղերում **փոխհատուցել, մտերմություն, ջանալ, անախորժություն** բառերից ո՞րը պետք է լինի:

ա) ..... բառը նշանակում է «մի բանի համար ծիգ ու ջանք գործադրել»:

բ) Երբ մեկի կյանքում անհաջողություն կամ տհաճ դեպք է լինում, ասում են՝ ..... է պատահել:

գ) Մեկի հետ ջերմ բարեկամություն անելը ..... է կոչվում:

դ) Կյանքում միշտ չէ, որ հաջողվում է մեկի լավության տակից դուրս գալ, նրա արածին լավությամբ պատասխանել, այսինքն՝ .....

4. **Տանջվել** նշանակում է «շատ աշխատել, չարչարվել» և «հուզվել, անհանգստանալ, մտածմունքի մեջ ընկնել»: Բառը ո՞ր իմաստով է գործածվել **Երբ ստիպված է եղել պատժել քեզ, դրանից նա ավելի է տանջվել, քան դու ինքդ** նախադասության մեջ:

5. Կոպիտ նշանակում է «կոշտ», «անկիրթ», «վիրավորական»: Բառը իմաստով է գործածվել կոպիտ բառ արտահայտության մեջ:

6. Ի՞նչ բառեր և արտահայտություններ գիտես, որոնցով կարելի է ներում խնդրել:



### Հարցերի և առաջադրանքների արկղիկ

1. Ո՞րն է նամակի հիմնական միտքը: Մայրը որդուն ի՞նչ է խրատում:

2. Մայրն ինչպե՞ս է բնութագրում հորը:

3. Մոր կարծիքով հայրն ինչու՞ է փնտրում որդու մտերմությունը:

4. Նամակի ի՞նչ հատվածը ամենից շատ դուր եկավ քեզ: Ի՞նչու՞:

5. Մտածել-մտածիր, գնալ-գնա՛լ ձևերի նմանությամբ կազմիր խնդրել, նստել, մնալ, լողալ բառերի համապատասխան ձևերը:



### Պատմությունների և գրույցների գամբյուղ

1. Հայրիկիդ երբևէ օգնել ես նրա համար ծանր պահերին: Պատմիր:

2. Նամակով հայրիկից կամ մայրիկից ներողություն՝ն խնդրիր քո գործած որևէ սխալ արարքի համար:




Արեգի՛ ինչուի

«Մոր նամակում» **ի պարասիան** արդահայտությունն ինչ պարմայրեց: Ի՞նչ բառարանում գրա բացատրությունը՝ «որպես պարասիան»:

Պարզվում է, որ նման բազմաթիվ արդահայտություններ կան: Այսպես, **ի նշան հարգանքի**՝ «որպես հարգանքի նշան», **ի լուր բոլորի**՝ «որպես իմանան», **ի վիճակի չինել**՝ «ուժ, հնարավորություն ունենալ»:

Ի՞նչ արդար է, չէ՞: Բառարանում մի բառ ես փնտրում, բայց տես, թե փանիան ես սովորում:

Ինչուիկ



## ՏՂԱՅԻՍ

Դու չես սովորում գերազանց, տղան,  
Գովասանագրեր դու տուն չես բերում,  
Եվ ծնողական ձեր ժողովներում  
Բարի նախանձով չեն նայում վրաս:

Նեղում ես տատիդ, հոգու հետ խաղում,  
Ուշքդ օրերով գնդակին տալիս.  
Եվ հարևանի կինը սրտնեղում,  
Աղմուկիդ համար գանգատ է գալիս:



Տեսնո՞ւմ եմ անշուշտ... Բայց երբ խնամքով  
Ծածկում ես թախտին ննջած տատիկին,  
Երբ վշտիս պահին դու աչքի տակով  
Հետևում ես իմ խոսուն հայացքին,-

Երբ տան մրգերից բաժին ես տանում  
Մեր դռնապանի փոքրիկ տղային,  
Բակում կռվելիս պաշտպան ես կանգնում  
Ուժեղի ձեռքից տուժած տկարին,-

Տեսնո՞ւմ եմ, տղան, տեսնո՞ւմ եմ խորքից,  
Որ այդ խորդուբորդ քո կեղևի տակ  
Կան հանքեր հարուստ ու ոսկու երակ,  
Բխում է խորքում մի զուլալ հոգի...

Գուցե չես փայլի դիրքով ու ձիրքով,  
Աստղ չես դառնա ոչ մի երկնքում,  
Բայց բացվիր, զտվիր ու փայլիր հոգով,  
Մարդուն ջերմացրո՛ւ լույսով քո մաքուր:

Մանր եղիր, որդիս, մանր մնա կյանքում...

## Սիլվա Կապուտիկյան



**Թախտ  
պաշտպան  
խորդուբորդ  
միդ**



## Իմաստրախոսություն

Գիտելիքները մարդուն կշիռ են տալիս, իսկ արարքները՝ փայլ:





## Բառերի գանձատուփ

1. Աջ կողմից գտիր ձախ սյունակում գրվածների հոմանիշները:

գտվել	հորդել, ցայտել
բխել	նիրհել, քնել
ննջել	շողալ, ցոլալ
նեղել	մաքրվել, պարզվել
փայլել	անհանգստացնել, տանջել

2. *Տկար* և *վճիտ* բառի մեկական հոմանիշ և հակահիշ գրիր:

3. *Զրնգալ*, *կարկաչել*, *շողշողալ*, *փայլփլել* բառերի արմատներով և *խոսուն* բառի ածանցով բառեր կազմիր:



## Հարցերի և առաջադրանքների արկղիկ

1. Որդու հր լավ արարքներն են ուրախացնում մորը:
2. Մարդու հր հատկանիշներն են ամենից բարձր գնահատում:
3. Ո՞րն է բանաստեղծության հիմնական միտքը: Մայրն ի՞նչ խորհուրդ է տալիս որդուն:
4. Ծարունակիր շարքը՝ *գովասանագիր* - *գովասանագրեր*, *ձեռագիր* - ....., *օրագիր* - ....., *հեռագիր* - ....., *պատվոգիր* - .....



## Պատմությունների և զրույցների զամբյուղ

1. «Ինչպիսին կուզեմ լինել» վերնագրով շարադրություն գրիր:
2. Պատմիր քո ճանաչած ազնիվ մարդկանցից մեկի մասին:



Բանաստեղծության մեջ գտիր *թաքուն* և *պաշտպանել* բառերի իմաստն արտահայտող բառակապակցությունները:



Երակները մարդու մարմնի այն անոթներն են, որոնք արյունը հասցնում են սրտին: Բայց ոսկու երակ...

Ոսկու երակ են կոչում հանձնարարի այն բարակ շերտը, որից ոսկի են սրանում: Պարզ է, չէ՞, որ դա խիստ թանկարժեք շերտ է:





## ԹԱԳԱՎՈՐՆ ՈՒ ՀՈՂԱԳՈՐԾԸ


Գարնանային արևոտ մի օր, երբ թագավորն իր շքախմբով որսի էր գնում, տեսավ, որ զառամյալ մի ծերունի ընկուզենի է տնկում առվի ափին: Նրա կնճռապատ ձակատը ողողված էր քրտինքի կաթիլներով, որոնք գոհարների պես շողշողում էին արևի տակ:

Թագավորը սանձահարեց իր նժույգը, ողջունեց ծերունուն ու ասաց.

- Բարի՛ հայրիկ, ի՛նչն է քեզ ստիպում այդպես չարչարվել ու քրտինք թափել: Չէ՞ որ ընկուզենին շատ ուշ է պտուղներ տալիս, և դու դժվար թե նրա պտուղները վայելես:

- Տե՛ր արքա,- ասաց ծերունին,- եթե քո թագավոր հայրը քեզ ժառանգություն չթողներ իր գահը՝ ոսկով ու ակնեղենով, դու ինչպե՛ս կարող էիր մի ամբողջ երկիր կառավարել:

Հայրենի ծառն ու այգին էլ հողագործի գանձերն են: Մեր պապերը ծառեր են տնկել, որոնց պտուղը վայելում ենք:



Մենք էլ նույնը պիտի անենք մեր զավակների ու թոռների համար:


- Կեցցեն, իմաստուն՝ն ծերուկ,- ասաց թագավորը և դառնալով վեզիրին՝ հրամայեց, որ գեղջուկին տասը ոսկի պարգևի:

Ծերունին ոսկիները վերցրեց, շնորհակալություն հայտնեց թագավորին և ապա դառնալով դեպի նոր տնկած ծառը՝ մրմնջաց.

- Գոհ եմ քեզից, իմ փոքրիկ ընկուզենի, թող քո պտուղն անսպառ լինի, կյանքդ՝ երկար:

- Ինձ օրհնելու փոխարեն ծառին ես օրհնում, ծերուկ,- ասաց թագավորը:

- Ախր սա ինձ բարիք տվեց ոչ թե հիևզ կամ տասը տարի հետո, այլ հենց հիմա,- պատասխանեց ծերունին:



### **Առած-ասացվածքներ**



Աշխատանքը առաքիներությունների աղբյուր է:

Քրտիկքն աշխատանքի արցունքն է:

### **Իմաստասիրություն**



Ով շատ է աշխատում, երջանկությունը նրան է բաժին ընկնում:



### **Բառերի գանձատուփ**

1. **Օրհնել** նշանակում է «աղոթքով մեկին բարին ցանկանալ՝ մաղթել» և «մեկի անունը շնորհակալությամբ հիշել, նրան գովել»: Բառը ձր իմաստով է գործածվել այս պատմության մեջ:

2. **Շքախումբ**, **գառամյալ**, **սանձահարել**, **անսպառ** բառերը դիր համապատասխան իմաստների կողքին.

- անվերջ, չվերջացող, չսպառվող,
- սանձը քաշել, իրեն ենթարկել, զսպել,
- շատ ծերացած, ծեր,
- թագավորին կամ բարձր պաշտոնյային ուղեկցող զինված մարդկանց խումբ:

3. Գրի՛ր *ողջունել, պարգևել, չարչարվել* բառերի հոմանիշները:
4. Գրի՛ր *դժվար, գոհ, ուշ, երկար* բառերի հականիշները:
5. *Ակնեղեն* նշանակում է «թանկարժեք քարեր և նրանցից պատրաստված զարդեր»: Ինչպե՞ս կբացատրես *ոսկեղեն, արծաթեղեն* բառերը:



### Հարցերի և առաջադրանքների արկղիկ

1. Թագավորն ինչու՞ գովեց ծերունուն և տասը ոսկի տվեց նրան:
2. Ծերունին ի՞նչն էր համարում ամենակարևոր գանձը, ինչի՞ն էր տեղ տվել իր սրտում:
3. Ի՞նչ ես կարծում, ծերունին միայն թագավորի տված ոսկու՞ համար շնորհակալություն հայտնեց ծառին:
4. Թագավորը ծերունուն քաջալերեց *կեցցեն* բառով: Խրախուսանքի ուրիշ ի՞նչ բառեր ու արտահայտություններ գիտես:



### Պատմությունների և զրույցների զամբյուղ

1. Ընկուզենու և ընկույզի մասին տեղեկություններ հավաքիր և հաղորդի՛ր ընկերներիդ:
2. «Բարի գործի պտուղները» վերնագրով շարադրություն՝ն գրիր:



### Դադարի պահ

Այս սկարներն ի՞նչ մասնագիտություն կամ զբաղմունք են հուշում քեզ:







## ՊԱՊԸ

Համո Սահյան

Իմ պապը տնկել է  
 Մեր գյուղի շիվերը,  
 Իմ պապը պայտել է  
 Մեր գյուղի ձիերը:  
 Ջրել է իր այգին  
 Ու մարգը բահել է  
 Եվ արդար քրտինքով  
 Իր տունը պահել է:  
 Իմ պապը վարել է,  
 Իմ պապը ցանել է,  
 Իսկ հնձի ժամանակ  
 Ձեռքի մեջ մանգաղի  
 Պաստակը ցավել է:

*արդար  
 խորհել  
 արտասավել*

Իմ պապը հողի հետ  
 Խորհել ու խոսել է,  
 Ամալի հետ արտասավել,  
 Ջրի հետ հոսել է...  
 Մի օր էլ, երբ հանկարծ  
 Ծալվել են ճնկները,  
 Հարմանքից քարացել,  
 Ամոթից շիկնել է:  
 Թողել է ևս մաճը  
 Եվ շունչը պահել է,  
 Եվ հետո քրտինքը  
 Ճակատին պաղել է:  
 Եվ պապը ակոսում  
 Պառկել ու քնել է,  
 Խառնվել այն հողին,  
 Որ իրեն սնել է:



## Բառերի գանձատուփ

1. *Չարմանքից քարացել, ամոթից շիկնել է արտահայտություններից եզրակացրո՞ւ, թե ի՞նչ են նշանակում քարանալ և շիկնել բառերը: Դրանք գործածիր Նախադասությունների մեջ:*

2. *Ի՞նչ կապ ես տեսնում պաղել և պաղպաղակ բառերի միջև:*

3. ա) *Կարդա՛ իմաստով մոտ այս բառերի շարքերը.*

*մտածել - մտորել, խորհել, մտմտալ, կշռադատել,*

*լալ - արտասվել, հեկեկալ, հեծկլտալ, ողբալ:*

բ) *Յուրաքանչյուր շարքից առանձնացրո՞ւ այն բառը, որ գործածվել է բանաստեղծության մեջ:*

գ) *Հոմանիշների յուրաքանչյուր շարքից մեկ բա՛ռ առանձնացրու և գործածիր առանձին Նախադասությունների մեջ:*

4. *Պայտ-ը կենդանու սմբակի ձևով ու չափով պատրաստված տափակ երկաթն է, որ մեխում են ձիու կամ էշի ոտքերին: Այս բառից կազմվել է պայտել, որ նշանակում է «պայտ խփել»: Ինչպե՞ս են կազմվել տնկել, բահել, ցավել, շիկնել բառերը:*

5. *Բանաստեղծը քրտինք-ը բնորոշել է արդար բառով՝ արդար քրտինք: Ինչպե՞ս կբնորոշես ձին, հողը:*

### Աիրելի՛ ինչուիկ

*Գրեթե համոզված եմ, որ քեզ անձանոթ է մաճ բառը: Ուզում եմ պարզաբանել: Մաճը հողագործական մի հին գործիքի՝ գութանի կոթն է, որը բռնած վար է արել գյուղացին:*

*Այսօր գյուղարևութասկան աշխարհաբանների ժամանակ արքիական մեքենաներ և գործիքներ են կիրառվում, բայց հնապստ առարկաների անվանումները, ինչպես տեսնում ես, նույնպես կարող են գործածվել:*

*Քո ընկեր Գիրունիկ*





## Հարցերի և առաջադրանքների արկղիկ

1. Նկարագիր պապին, ինչպիսին է նա քո երևակայության մեջ և նկարում:
2. Բնութագրիր պապին, ասածներդ հիմնավորիր բանաստեղծության համապատասխան տողերի միջոցով:
3. Փորձիր կռահել, թե պապն ամոթից ինչն է կարմրել:
4. Բացատրիր բանաստեղծության վերջին երեք տողը:
5. Պապիկդ ինչ բառերով է գովում քեզ կամ իր սերն արտահայտում: Ուրիշ ինչպիսի յուրահատուկ բառեր և արտահայտություններ է գործածում քո պապիկը:
6. Գրիր **ինձի, բրդից, գծով, տնից, լճի, սրտով, շնից** բառերի ուղիղ (**ինչ** հարցին պատասխանող) ձևերը:  
Նմուշ՝ **ջրի - ջուր, գևով - գին:**



## Պատմությունների և զրույցների զամբյուղ

1. Պատմիր քո պապի մասին:
2. Դու ձեր ընտանիքի գործերին մասնակցում ես: Ի՞նչ ես կարողանում անել. պատմիր:



Փորձիր բացատրել, թե իմաստային ի՞նչ տարբերություն ունեն **արտասվել** և **ողբալ** հոմանիշները:



## Իմաստունի խորհուրդները

Աիրի՛ր աշխարանձր, այն բոլոր բարիքների մայրն է:  
Նշխարելիս միշտ համա՛ն եղիր, մի՛ նահանգիր դժվարու-  
թյունների պարճատով և գործդ կիսար մի՛ թող:  
Գործդ հաճույժով կարարիր:  
Միշտ բարի և լավ գործեր արա, և մարդիկ կսիրեն ու  
կգնահատեն քեզ:



## ՇՆԻԿԸ



Նա ծնվեց մի նեղ ու կեղտոտ փողոցի անկյունում: Ընդամենը չորս տարեկան էր, երբ ծնողները քեցին շնիկին, և նա այս մեծ աշխարհում մնաց միայնակ: Գնալով կյանքը դժվարանում էր: Ճոխ ռեստորանների ու մսի խանութների աղբամանները շրջապատված էին տարեց շների ոհմակներով: Ամենահամարձակները հափշտակում էին եղած-չեղածը, իսկ փոքրերն ու թույլերը բավարարվում էին մնացորդներով:

Ամեն երեկո շնիկը թափառում էր հին ու մռայլ փողոցներում ու նրբանցքներում, մտնում այգիներն ու պարտեզները: Մարդիկ նայում էին ու լուռ անցնում: Ոչ մեկը չէր օգնում կամ ուտելու որևէ բան տալիս: Մութն ընկնելուն պես թափառական շնիկը մտնում էր իր սովարաթղթե տնակն ու քնում: Արևը ծագելուն պես ամեն ինչ սկսվում էր նորից:

Մի օր էլ շնիկն իր ծանոթ մայթեզրին տարօրինակ, բայց իր համար գեղեցիկ մի բան տեսավ: Հաստատ ուտելիք չէր: Փորձեց հարմարեցնել դնչիկին:

«Ինչ տարօրինակ է. ամեն ինչ մեծ ու գեղեցիկ է երևում», - մտածեց շնիկը:

Տարօրինակ առարկան դնչիկին՝ շնիկը մտավ ծաղկավաճառի մոտ: Ծաղկավաճառը նայեց նրա ականջներին ու ժպտաց:

- Ինչ գեղեցիկ է կյանքը,- ուրախացավ շնիկն ու գնաց մտավ խաղալիքների խանութը: Հետո զբոսնեց քաղաքի մեծ զբոսայգում: Ակնոցի հետևից երկու խոշոր աչքեր նայում էին լողավազանում չարչարվող ձկներին: Նրանք, պատեպատ զարկվելով, ուզում էին ազատվել քարե ավազանի ճանկերից:

Ուրախացած շնիկը քայլում էր, երբ փողոցի մի անկյունից սրինգի հնչյուններ լսեց: Շնիկը դանդաղ մոտեցավ:



- Բարև, շնիկ,- ասաց երաժիշտը և ուրախ ավելացրեց,- ուրեմն դու ես գտել իմ ակնոցը: Առավոտյան ես այն կորցրի. գրպանիցս էր ընկել: Կվերադարձնեմ. առանց ակնոցի ես շատ եմ դժվարանում:

**հափշտակել  
երբանցք  
տարօրինակ  
որևէ**

- Ներեցե՛ք, բայց չեմ կարող, որովհետև ակնոցը կյանքս փոխեց: Առաջ ամեն ինչ մռայլ էր ու տխուր, մարդիկ ինձ չէին սիրում, իսկ հիմա ուրիշ է:

Երաժիշտը լսեց նրան, ապա ասաց.

- Լսիր, փոքրիկ, եթե դու մենակ ես աշխարհում և տխուր ես, արի՛ ընկերանանք: Ընկերությունը լավ բան է. ես հավատացած եմ, որ ընկերոջ հետ աշխարհը կսիրես առանց ակնոցի էլ:


Շնիկը մտածեց, հետո նայեց ծեր երաժիշտին.

- Դե ինչ, վերցրո՛ւ ակնոցդ,- ասաց ու դժվարությամբ բաժանվեց ակնոցից:

- Ե՛կ, բարեկամս, գնանք: Տանը մեզ են սպասում:

Այդ օրվանից շնիկը տխուր չէր, ապրում էր երջանիկ, որովհետև էլ մենակ չէր, գտել էր իր մեծ բարեկամին ու ընկերոջը, որը սիրեց ու գուրգուրեց նրան:

Ֆրանսերենից փոխադրեց  
**Հոփսիմե Բշտիկյանը**



**Հանելուկ**

Շատ նման է նա գայլի,  
Բայց գայլի հետ չի քայլի,  
Հավատարիմ ու արի  
Բարեկամն է մեր բարի:



## Բառերի գանձատուփ

1. Կարդա՛ բառերի իմաստները: Բառերը ո՞ր իմաստով են գործածվել պատմվածքում:

ա) Հափշտակել - «ուժով, ճարպկությամբ խլել» և «գողանալ»:

բ) Լքել - «մեկին թողնել-հեռանալ, անօգնական թողնել» և «մի տեղից հեռանալ»:

3. Գրի՛ր խոշոր, լուռ, համարձակ բառերի հոմանիշները:

4. Գրի՛ր փոքր, թույլ, տխուր, ծանոթ բառերի հականիշները:

5. Պատեպատ նշանակում է «պատից պատ»: Մի բառով ինչպե՞ս կասես սարից սար, դռնից դուռ, տնից տուն:



## Հարցերի և առաջադրանքների արկղիկ

1. Որտե՞ղ էր ծնվել և որտե՞ղ էր ապրում շնիկը:

2. Ինչպիսի՞ կյանքով էր ապրում շնիկը մենակ մնալուց հետո:

3. Ծնիկն արևայի՞ն ակնոց էր գտել, թե՞ օպտիկական:

4. Երաժիշտն ի՞նչ գործիք էր նվագում: Մի քանի ուրիշ գործիք էլ դո՛ւ թվարկիր:

5. Քո կարծիքով մարդիկ ինչու՞ սկսեցին ժպտալ շնիկին:

6. Քար (ի՞նչ) - քարե (ի՞նչպիսի՞) զույգի նմանությամբ արծաթ, ոսկի, փայտ, կավ բառերից հատկանիշ ցույց տվող բառեր կազմիր:



## Պատմությունների և զրույցների զամբյուղ

1. Ծների կամ կատուների մասին զվարճալի որևէ պատմություն գիտե՞ս: Պատմի՛ր կամ ի՞նքդ հորինիր:

2. Պատմի՛ր մարդու և կենդանու բարեկամության մասին:



## Դադարի պահ



ակնոց



ակնոցներ



## ԾԱՌԻ ԽՆԴԻՆՔԸ

Մի կտորատիր իմ ճյուղերը,  
Որդիներն են նրանք իմ հեզ,  
Ես այնպես եմ սիրում նրանց,  
Ինչպես մայրդ սիրում է քեզ:

մղկտալ  
տորթ  
օրնիբուն

Տերն անգամ եթե պոկես,  
Սիրոս ցավից կմղկտա,  
Թե որ դու ինձ չպահպանես,  
Պատրաստի ծառ քեզ ղվ կտա:

Թող որ բերեմ քեզ հով ու զով,  
Կեղտ ու փոշուց մաքրեմ օդը,  
Կանաչ-կանաչ իմ ձեռքերով  
Ցրեմ ամռան կիզիչ տորթը:

Ծիտ ու ծիծառ առնեմ ուսիս,  
Օրոր ասեմ ես օրնիբուն,  
Եվ քո կյանքի ճանապարհին  
Մնամ որպես գեղեցկություն:

### Հանելուկ

Ձմռանը տաքացնում է,  
Գարնանն ուրախացնում է,  
Ամռանը զովացնում է,  
Աշնանը՝ կշտացնում:



## Բառերի գանձատուփ

1. Գրիր *հեզ, կիզիչ, օրնիրուն, տոթ* բառերի հոմանիշները:
2. Գրիր *մաքրել, ցրել, տալ, մնալ* բառերի հականիշները:
3. *Տերև անգամ եթե պոկես* նախադասության մեջ *անգամ* բառը գործածվել է «մինչև անգամ» իմաստով: Մի հոմանիշ էլ դու՛ գրիր:



## Հարցերի և առաջադրանքների արկղիկ

1. Ծառն իր ձյուղերը ու՛մ հետ է համեմատում:
2. *Ծիծառ* բանաստեղծական բառով հեղինակը ո՞ր թռչունին է անվանում:
3. Համեմատիր *կոտրել* և *կոտրատել* բառերը: Ի՞նչ տարբերություն ես տեսնում: Դրանց նման բառերի 2 զույգ էլ ի՛նքդ գրիր:



## Պատմությունների և զրույցների զամբյուղ

1. Ի՞նչ գիտես ծառերի տված օգուտի մասին: Պատմիր:
2. «Ծառի նամակը» վերնագրով շարադրանք գրիր:



## Լեզվաբանի դասը

*Մայր և ձյուղ* բառերն ի՞նչ ընդհանուր գծեր ունեն: Թվարկիր:

### Գոյական. անձ և իր ցույց տվող գոյականներ

Առարկա ցույց տվող բառերը կոչվում են գոյականներ: Առարկա ասելով՝ հասկանում ենք մարդ, կենդանի, իր, երևույթ և այլն:

Գոյականները պատասխանում են *ո՞վ, ի՞նչ* հարցերին:

*Ո՞վ* հարցին պատասխանող գոյականները *անձ* են ցույց տալիս: Օրինակ՝ *մարդ, բժիշկ, աղջիկ, լողորդ*:

*Ի՞նչ* հարցին պատասխանող գոյականները իր են ցույց տալիս: Օրինակ՝ *տուն, կաղնի, անձրև, լույս*:

Կենդանի ցույց տվող գոյականները, օրինակ՝ *շուն, վագր, աղավախ*, ևս պատասխանում *ինչ* հարցին են պատասխանում:







Նանսեն Միքայելյան

## ՄԱՅՐ ՀԱՅԱՍՏԱՆ

ձյունապատ  
ընդդեմ

Գիտեն, մանկիկ իմ սիրասուն,  
Թե ինչո՛ւ ենք  
Մենք մայր ասում  
Հայաստանին՝  
Մեր ոստանին,  
Այգի դարձած  
Քարաստանին:  
Որովհետև մայր է հողի,  
Լույսի, ջրի ու արևի,  
Մայր է գինու և խաղողի,  
Մայր՝ լեռնային վտակների,  
Մայր՝ ձյունապատ գագաթների՝  
Մեր Հայաստան մայրը բարի  
Արդեն քանի հազար տարի  
Զավակներ է ծնել արի  
Եվ կանգնել է ընդդեմ չարի՝  
Որդիներով իր քաջարի:  
Եվ մենք հիմա, իմ սիրասո՛ւն,  
Հայաստանին մայր ենք ասում.



Մայր՝ խնդալից քո մանկության,  
Մայր՝ անսահման երջանկության,  
Մայր՝ վարդագույն քաղաքների,  
Մայր՝ երազի,  
Լույսի անմար  
Եվ գալիքի արևամայր:



*Երբ ասում են Հայաստան, ակամա ոտքի եմ կանգնում:*

*Ռաֆայել Իսրայելյան (Սարդարապատի հուշահամալիրի ճարտարապետը)*





## Բառերի գանձատուփ

1. Շարքերից ընտրիր և կողք կողքի գրիր հոմանիշները:  
 գալիք անսահման սիրասուն անմար խնդալից  
 սիրելի մշտավառ ուրախ ապագա անվերջ

2. ա) Հետևյալ տողերում երկու զույգ հոմանիշ կա: Գտիր դրանք:

Ջավակներ է ծնել արի  
 Եվ կանգնել է ընդդեմ չարի՝  
 Որդիներով իր քաջարի:

բ) Հոմանիշները գործածիր նախադասությունների մեջ:

3. ա) Հայաստան նշանակում է «հայերի երկիր»: Ինչպե՞ս կբացատրես քարաստան բառը:

բ) Քարաստան բառի ածանցով և ծառ, միրգ, ծաղիկ, այգի (ի-ն դառնում է ե) արմատներով բառեր կազմիր:

Արեգի՛ Գիպունիկ  
 Նկարե՞նք ես արդյո՞ք, որ **նարան** բառը,  
 որը նշանակում է «մայրափաղափ», այս  
 բանաստեղծության մեզ հեղինակը գործածել է  
 «հայրենի երկիր՝ հայրենիք» իմաստով:  
 Գիպե՛մնիկ



## Հարցերի և առաջադրանքների արկղիկ

1. Ըստ բանաստեղծության թվարկիր, թե Հայաստանն ինչերի «մայրն» է:

2. Հեղինակը հատկանիշ ցույց տվող ի՞նչ բառով է բնութագրում քո մանկությունը: Դու ի՞նչ բառեր կօգտագործես:

3. Գրիր 3 գոյական, որոնք երկրների անուններ են:

4. **Մանկիկ, ոստան, մայր, մանկություն, զավակ, որդի, զագաթ** բառերը գրիր համապատասխան սյունակներում:

իվ	ինչ



## Իմաստունի օրատետրից

### Հայաստանի Հանրապետության դրոշը



Իսայասրանի Իանրապետության պետական դրոշը կոչվում է **եռագույն**:

**Կարմիրը** խորհրդանշում է հայ ժողովրդի պայքարը հանուն անկախության, ապարության և փրկարոնեական հավասրի:

**Կապույտը** խորհրդանշում է հայերի՝ խաղաղ երկնքի րակ ապրելու կամքը:

**Ծիրանագույնը** խորհրդանշում է հայ ժողովրդի սրեղծագործ րաղանըր և աղիասրասեր ոգին:

Եռագույնը բարչրապվում է կոտավարական շենքերի, պետական հիմնարկների, օրար երկրներում Իայասրանի դեասպանասրների շենքերի վրա, ինչպես նաև միզապգային պաղրոնական հանդիպումների, մարպական մրչումների ժամանակ:



### Պատմությունների և գրույցների զամբյուղ

1. Հայաստանի խորհրդանիշներից մեկի մասին տեղեկություններ ներկայացրու ընկերներիդ:
2. «Մայր Հայաստանի իմ փոքրիկ անկյունը» վերնագրով շարադրություն գրիր:



### Տատիկի խորհուրդները

Չոգրիկա, հիղիր, որ փո սիրո ու հոգասրարության կարիքն ունեն ոչ միայն մարդիկ:

Արիր փո հայրենի երկիրը, բնակավայրը, սիրով ու ինամքով վերաբերվիր ամեն ծառ ու թփի, ամեն գետրի ու աղբյուրի:

Իոգասրար եղիր մարդկանց ու կենդանիների նկարամբ, պահիր ու պահպանիր փո լեպուն ու հավասր:



### Դադարի պահ

Բառաշղթայի բառերը դասավորիր ըստ գույների և կարդա՝ իմաստախոսությունը:

**հողի ինչպես այնպես անհնար առանց է հայրենիքի ապրել էլ**






Պատվական Խաչատրյան

## ՀԱՅԱՏԱՆ

Հայաստանը  
 Իմ անունն է,  
 Ազգանունն է,  
 Ինձ ուժ տվող զորությունն է,  
 Իմ հիևը և նորությունն է,  
 Իմ լեզուն է, այբուբենը,  
 Ուրիշ խոսքով՝ այն ամենը,  
 Որ կոչվում է հայրենի տուն...  
 Եվ այն տունն է,  
 Որ շինել է պապիս պապը  
 Անդուլ ջանքով  
 Ու տանջանքով.  
 Քար է դրել քարի վրա,  
 Դար է դրել դարի վրա  
 Եվ քրտիկքը թուխ ձակատին՝  
 Ձուլել է ևս պատը պատին:  
 Էլ ոչ մի հուր,  
 Էլ ոչ մի սուր  
 Չի մտնելու իմ նոր տունը,



Չի ջնջելու իմ անունը,  
 Ազգանունը,  
 Իմ լեզուն ու այբուբենը,  
 Ուրիշ խոսքով՝ այն ամենը,  
 Ինչը ամուր սյունն է իմ տան  
 Եվ միասին կոչվում է հայ  
 Ու Հայաստան:

Եվ ես հիմա իմ տան պատին  
 Նոր-նոր քարեր պիտի դնեմ,  
 Նոր-նոր դարեր պիտի դնեմ,  
 Որ գնալով հզորանա,  
 Ծլարձակի ու նորանա,  
 Որ միշտ պահի իմ անունը,  
 Ազգանունը,  
 Իմ մայր լեզուն, այբուբենը,  
 Ուրիշ խոսքով՝ այն ամենը,  
 Ինչը կյանքն ու խորհուրդն է տան  
 Եվ միասին կոչվում է հայ  
 Ու Հայաստան:



*Սուրբ է հայրենիքը: Նա մեր հացն է, մայրական գիրկը, մեր մանկությունն է, մեր պապերի գերեզմանն է և մեր մանուկների զվարթ օրորոցը:*

*Ավետիք Իսահակյան*



### **Քառերի գանձատուփ**

1. Եթե **անդուլ** նշանակում է «անդադար», ապա ի՞նչ կնշանակի **գործադուլ** բառը:

2. Հայաստանում ապրող հայր կոչվում է **հայաստանցի**: Ինչպե՞ս ենք կոչում **ա)** Ամերիկայում ապրող հային, **բ)** Լիբանանում ապրող հային, **գ)** Ֆրանսիայում ապրող հային:

Նմուշ՝ **Պարսկաստանում (Իրան) ապրող հայ – պարսկահայ:**

3. Հայկական այնպիսի անուններ գրիր, որոնցից ազգանուններ են կազմվել: Նմուշ՝ **Արարատ - Արարատյան:**



## Հարցերի և առաջադրանքների արկղիկ

1. Մեկնաբանիր բանաստեղծության վերջին տողերը:
2. Հայ նշանավոր հերոսների անուններ թվարկիր:
3. Քեզ համար Հայաստանը միայն Հայաստանի Հանրապետությունն է:
4. Բանաստեղծությունից դուրս գրիր 5 հասարակ գոյական (**ի՛նչ** հարցին պատասխանող):



## Պատմությունների և հեքիաթների զամբյուղ

1. «Իմ երկիրը» վերնագրով շարադրություն գրիր:
2. Հայկական մի ավանդազրույց կամ հեքիաթ պատմիր:



## Իմաստունի օրատեսրից

### Հայաստանի Հանրապետության գիևանշանը

Խայաստանը 1918 թ. անկախություն չեռժ բերեց և ունեցավ իր պիևանշանը:

Ձիևանշանի կենտրոնում՝ վահանի վրա, պարկերվաժ են Նրարար շեռը՝ Նոյի տրապանով, և պարմական Խայաստանի չորս թագավորությունների՝ Նրարաշեայանների, Բագրարունիների, Նրշակունիների, Ուրբինյանների պիևանշանները:

Վահանը պահում են արժիվն ու առյուժը, որոնժ հին Խայկական խորհրդանիշներ են:

Ձիևանշանը պարկերվում է կառավարական շենժերի, պերական հիմնարկների ցուցանակների, մերադադրամների, կնիժների վրա և այլն:





## ՍԱՍՆԱ ԴԱՎԻԹԻ ԴԱՎԻԹ 1

Սասնա Դավիթն ելավ հեծավ, խթանեց ձին ոսկեթամբ  
Ու սրաթև արծվի նման թռավ հասավ Ծովասար:  
Այնտեղ ձիուց նա ցած իջավ ու պատյանից սուրը հանած՝  
Դրեց իր հոր գերեզմանին, համբուրեց քարն ու ասաց.  
- Հայր իմ, օրհնիր սուրս արդար և պատանի քո որդուն,  
Կռիվ կերթամ ոսոխի դեմ, հաստատ մնա Սասնա տուն...  
Կերթամ Մսրա բռնակալին դուրս քշելու մեր հողից,  
Որ մեր սարերն ազատ մնան, ու բոց չելի քո սրտից...

Կանչեց Դավիթն ու սլացավ, սուրաց ինչպես հողմ ուժգին,  
Հասավ, կանգնեց իր նժույգով Սեղանսարի բարձունքին:  
Նայեց նա ցած. դաշտում փռված Մսրա զորքին թիվ չկար,  
Ծածկվել էր դաշտն ընդարձակ՝ վրաններով անհամար:  
- Հեյ-հեյ, լսե՞ք, վեր կացե՞ք, վեր,  
Մսրա զորքեր.

Ի՞նչ եք քնել խորունկ եղպես՝  
Մեռելի պես:  
Ելե՞ք, իսկույն զենք կապեցե՞ք,  
Ձի՛ թամբեցե՞ք, ելե՞ք հեծե՞ք,  
Հետո չասե՞ք,  
Թե Դավիթը սուրն անխնա  
Քաշեց քնած զորքի վրա:

Գոռաց Դավիթն ամպի նման Սեղանսարի կատարից  
Եվ ահարկու թուր Կայծակին դուրս քաշելով պատյանից՝  
Դաշտ սլացավ ու շանթի պես ճայթեց Մսրա բանակում:  
- Ի՞նչ եք եկել, բանակ զարկել Սասնա ազատ աշխարհում,-  
Գոչեց Դավիթն ու աջ ու ձախ շանթահարեց իր սրով,

*օրհնել  
այնոր  
արյուն  
մեղք  
ընդարձակ  
բարձունք*

Դաշտը ներկեց հազարավոր զինվորների արյունով:

Այն ժամանակ Մարա զորքից, ձեղքելով ծովն արյունի,  
Եկավ կանգնեց Դավթի առաջ մի ալեգարդ ծերունի:

- Դավիթ,- ասաց,- զսպիր մի պահ քո

բարկությունն ահագին

Եվ լսիր ինձ, ականջ արա ալևորիս խոսքերին:

Ի՞նչ ես արել քեզ էս մարդիկ, որ կոտորում ես

էդպես,

Ամեն մեկը մի տան ձրագ, մի տան սյուն է

հենց քեզ պես:

Թագավորն է քո թշնամին, կռիվդ նրա՛ հետ արա,

Նա է պոկել տնից-տեղից ու բերել է մեզ բռնի,

Տվել էստեղ սրի բերան... Չհնվորը ի՞նչ մեղք ունի...

- Ճիշտ ես ասում դու, ծերունի՛, հավան եմ քո խոսքերին,

Բայց թագավորն ու՛ր է, ասա՛, որ սև բերեմ իր օրին:

## Ասացվածք

Թշնամությունից բարիք չի ծնվում:



## Բառերի գանձատուփ

1. Գտիր **ձի**, **ոտիս**, **սուրալ**, **լսել** բառերի հոմանիշները:
2. **Շանթ** նշանակում է «կայծակ», **կարկտահարել** նշանակում է «կարկուտով հարվածել՝ ծեծել», «կարկուտի նման հարվածել»: Ինչպե՞ս կբացատրես **շանթահարել** բառը:
3. **Տան ձրագ** նշանակում է «տան, ընտանիքի հույս, հե- նարան»: Գտիր այն հատվածը, որտեղ օգտագործվել է այս բառակապակցությունը:



## Հարցերի և առաջադրանքների արկղիկ

- Վերը ներքոցիր այն հատվածները, որտեղ երևում է, որ Դավիթը՝
  - ա) հայրենասեր և ազատասեր է,
  - բ) կռվի մեջ արդար է ու ազնիվ, անհավասար կռիվ չի սիրում, ուրիշի թուլությունից չի օգտվում,
  - գ) լսում ու հարգում է մեծերի խոսքը, նրանց խորհուրդը:
- Ինչպես կրացատրես հետևյալ արտահայտությունները՝
  - ա) *Մտրա զորքին թիվ չկար,*    բ) *արյան ծով:*
- Ինչպես ես հասկանում Դավթի խոսքը՝ ուղղված Մտրա զորքին:
- ա) Կարդացածդ հատվածից դու՛րս գրիր անձ ցույց տվող (ո՛վ հարցին պատասխանող) 4 հասարակ գոյական:
  - բ) Իր ցույց տվող (ինչ հարցին պատասխանող) 4 հասարակ գոյական էլ ինքդ գրիր:



## Պատմությունների և հեքիաթների զամբյուղ

- Վիպերգից այլ հատվածներ կարդա և պատմիր:
- Մի հեքիաթ կարդա, որտեղ քաջ հերոսը հաղթում է չարին:




*Խթանը* կոշիկների կրունկներին ամրացվող մետաղյա հարմարանքն է, որով ձիավորները խփում են ձիու կողերին, որպեսզի նա տեղից շարժվի: Ուրեմն ի՞նչ է նշանակում *խթանել*:



## Դադարի պահ

Լուծիր գաղտնագիրը և կիմանաս, թե ո՞ր լեզուներով է թարգմանվել «Սասնա ծռեր» վիպերգը:

- |       |        |       |
|-------|--------|-------|
| ★ - ե | □ - ր  | ● - ս |
| ○ - ա | × - ու | ▼ - պ |
| ◐ - հ | ◆ - ն  | ◇ - ֆ |
| ◑ - ռ | ▲ - կ  |       |
| * - գ | ◇ - լ  |       |





## Լեզվաբանի դասը

Ծովինար, Մհեր, Սասունցի Ռավիթ. սրակք ինչնր են:

### Գոյական. հատուկ և հասարակ

Գոյականները լինում են **հատուկ** և **հասարակ**:

Միատեսակ բոլոր առարկաներն ունեն մեկ ընդհանուր անուն, որը կոչվում է **հասարակ** անուն: Օրինակ՝ **լիճ, քաղաք, տղա, կին**:

Միատեսակ առարկաներից ամեն մեկին տրվող առանձին անունը կոչվում է **հատուկ** անուն:

Հատուկ անուններ են՝

**ա)** մարդկանց անունները և ազգանունները, օրինակ՝ **Հայկ, Անահիտ, Ղազարոս Աղայան,**

**բ)** երկրների, քաղաքների, գյուղերի, լճերի, գետերի, լեռների, դաշտավայրերի անունները, օրինակ՝ **Հայաստան, Երևան, Օշական, Սևան, Հրազդան, Արագած, Արարատյան դաշտ,**

**գ)** կենդանիների տրվող անունները, օրինակ՝ **Բողար, Ծեկո,**

**դ)** թերթերի, ամսագրերի, ստեղծագործությունների անունները, օրինակ՝ **«Ծիծեռնակ»** ամսագիր, **«Ռսկե ձկնիկը»** հեքիաթը:

**Հատուկ** անունները գրվում են **մեծատառով**:



### Իմաստունի օրատեսրից

#### Սասնա ծոեր

«Սասնա ծոեր» կամ «Սասունցի Ռավիթ» վիպերգը արեղծվել է շար հին ժամանակներում: Վիպերգը մեզ է հասել շնորհիվ այն մարդկանց, որոնք մտապահել ու անգիր պարմել են այդ արեղծագործությունը և փոխանցել ուրիշներին: Սոսանչին հարվածներ նույնիսկ երգել են:

Վիպերգի գլխավոր հերոսը Սասունցի Ռավիթն է: Վիպերգում պարմվում է ոչ միայն Ռավիթի, այլ նաև նրա պսակի՝ Սանասարի, հոր՝ Մեծ Մհերի, որդու՝ շոքր Մհերի կյանքի պարմությունը: Այդ պարմություններից յուրաքանչյուրը կոչվում է **ճյուղ**: Իսպկական վիպերգն ունի չորս ճյուղ՝ «Սանասար և Քաղրասար», «Մեծ Մհեր», «Սասունցի Ռավիթ» և «շոքր Մհեր»:





## ՍԱՍՈՒՆՑԻ ԴԱՎԻԹ 2

Ելավ Դավիթն ու ձին հեծավ, քշեց գևաց քամու նման  
 Ու կանգ առավ թագավորի մեծ վրանի դեմ հանդիման:  
 - Մելիք,- գոռաց,- դու՛րս արի շուտ, կռիվ անենք, զարկենք իրար,  
 Ի՛նչ ես ընկել վրանիդ մեջ՝ ծանր, ինչպես ջաղացքար:

Հենց որ Դավթի ձայնը լսեց,  
 Սարսափն առավ դև Մելիքին.  
 Ու կեղծավոր լեզվին դիմեց,  
 Որ նենգաբար խաբի կրկին:



- Դավիթ,- ասաց,- արի՛, նստենք,  
 Դեռ հանց ուտենք իմ վրանում,  
 Հետո կելնենք, կռիվ կանենք,  
 Եթե կռվել ես կամենում:

- Չեմ նստի ես քո սեղանին  
 Քեզ հետ, Մելիք, հաց չեմ կիսի,  
 Չես կարող ինձ խաբել կրկին  
 Այդ խոսքերով քո աղվեսի:

**հոգի  
 խաբել  
 համբուրել  
 կեղծավոր**

Մելիքը որ տեսավ՝ զուր է, էլ չի կարող խաբել Դավթին,  
 Ճարը կտրած՝ հրամայեց դուրս քաշել իր հրեղեն ձին:

Դավիթն հեծավ ձին հրեղեն ու քաշելով Թուր Կայծակին,  
 Եկավ թափով, որ մի զարկով առնի Մարա դևի հոգին:  
 Փայլատակեց Թուր Կայծակին, իջավ թափով ու շեշտակի  
 Կիսեց Մարա նենգ Մելիքին ...

Կանգնեց Դավիթն, ապա հպարտ դարձավ Մարա զինվորներին.

- Մեկ էլ չգա՛ք դուք մեզ վրա, ոտք չդնեք Սասնա հողին:  
 Բայց թե որ սիրտ անեք կրկին սուր քաշելու դուք մեզ վրա,  
 Սասնա ահեղ Թուր Կայծակին, ինչպես այսօր՝ կշողշողա,



Կելնեն ձեր դեմ առյուծասիրտ հազար Միեր և Սանասար,  
Հազար Դավիթ, Քեռի Թորոս կանեն հողին ձեզ հավասար:

## Իմաստախոսություններ

Եթե ուժը միանա արդարության հետ, ինչը կարող է ուժեղ  
լինել այդ միությունից:

Խաղաղությունը և ազատությունը բարիքներից մեծագույնն  
են:



Գիրունիկ, ասա՛,  
ինչքե՞ն որևէ րե՞ղ  
հոգի են վաճառում, և հոգին  
կարելի՞ է առնել: «Ասատույցի  
Պավիթը» կարդայիս րե՞սա  
առնի մարա դևի հոգին  
արտահայտությունը:

Գիրեն, ինչուի՞կ,  
մեր լեզվում՝ շար  
արտահայտություններ կան,  
որոնք ուղղակի իմաստով  
չպետք է հասկանաս: Պրանցից  
ամեն մեկն իր յուրահարուկ  
իմաստն ունի, որը պետք է  
հասկանաս րվյալ հարվածից կամ  
գրնես բառարանում: Կարող ես հարցնել իմացողներին,  
ինչպես որ հիմա արեցիր:  
հոգին առնել նշանակում է «սպանել»:



## Բառերի գանձատուփ

1. Գրի՛ր փայլատակել, զարկել, առյուծասիրտ, զուր, դեմ հանդիման, անհամար բառերի հոմանիշները:
2. Նենգ նշանակում է «խարդախ, խորամանկ»: Օրինակ՝ նենգ թշնամի «խարդախ, խորամանկ թշնամի»: Իսկ ինչ է նշանակում նենգաբար (նենգաբար խաբել):
3. Բացատրի՛ր նախադասությունները՝
  - ա) Սարսափն առավ դև Մելիքին:
  - բ) Հավան եմ քո խոսքերին:
4. Էս, էդպես, ջաղացքար բառերը խոսակցական են: Գրի՛ր դրանց գրական ձևերը:



## Հարցերի և առաջադրանքների արկղիկ

1. Ու՛մ դեմ էր կռվի ելել Դավիթը և ինչու՞:
2. Ինչու՞ են հերոսին Սասունցի Դավիթ անվանում:
3. Դավիթը Մելիքին ո՞ր կենդանու հետ է համեմատում: Ինչու՞:
4. Համեմատիր Դավթին և Մելիքին:
5. Կարդացածդ հատվածում գտիր անձ և իր ցույց տվող գոյականներ և գրիր համապատասխան սյունակում:

անձ ցույց տվող		իր ցույց տվող	
հատուկ	հասարակ	հատուկ	հասարակ



## Պատմությունների և զրույցների զամբյուղ

1. Նկարագրիր, թե ինչպե՞ս ես պատկերացնում Սասունցի Դավթին:
2. Գտիր «Սասունցի Դավթի» նկարագրողումներից և ներկայացրո՛ւ դասարանիդ ուշադրությանը: Նկարի մասին կարծիքդ շարադրիր գրավոր:




Փորձիր ինքնուրույն բացատրել, թե կապույտ գրվածներն ի՞նչ են նշանակում:

Բայց թե որ սիրտ անեք կրկին սուր քաշելու դուք մեզ վրա: Սասնա ահեղ Թուր Կայծակին, ինչպես այսօր՝ կշողշողա, Կելնեն ձեր դեմ առյուծասիրտ հազար Մհեր և Սանասար, Հազար Դավիթ, Քեռի Թորոս կանեն հողին ձեզ հավասար:



## Դադարի պահ

Կծիկի թելին հետևելով՝ կարդա՛ իմաստախոսությունները:





## ՄԱՏԵՆԱԴԱՐԱՆ

Մատենադարան բառը կազմված է մատյան և դարան բաղադրիչներից: Մատյան հնում նշանակել է «գիրք», իսկ դարան նշանակում է «պահոց», «պահարան», այսինքն՝ Մատենադարանը գրապահոց է:



Հին ժամանակներում հայերը, ինչպես և այլ ժողովուրդներ, գրքերը գրում էին ձեռքով:

Այդ պատճառով էլ դրանք կոչվում են **ձեռագիր** մատյաններ: Դրանցից շատերը մագաղաթից են: Մագաղաթը հատուկ եղանակով պատրաստում էին հորթի, գառան կամ ուլի կաշվից: Մարդիկ կային, որոնք տարբեր հեղինակների գրվածքներն արտագրում էին մագաղաթե թերթերի վրա: Նրանց **գրիչներ** էին անվանում: Իսկ մատյանները պատկերազարդող նկարիչներին **ծաղկող** էին անվանում: Հետո ուրիշ վարպետներ մագաղաթները միացնում էին, կազմում ու գիրք դարձնում:

Հայերեն հազարավոր ձեռագիր մատյաններ այժմ պահվում են Երևանի Մաշտոցի անվան Մատենադարանում: Այդ պատճառով էլ այն հաճախ կոչում են **ձեռագրատուն**:

Ձեռագրերից շուրջ 14 հազարը հայերեն են, 2800-ը՝ օտար լեզուներով: Սրանց մեջ կան արաբերեն, պարսկերեն, թուրքերեն, հունարեն և այլ լեզուներով մատյաններ: Դրանք վերաբերում են գիտության ու մշակույթի տարբեր բնագավառների՝ պատմություն, գրականություն, քերականություն, մաթեմատիկա,

**մատյան  
Մատենադարան  
ժողովուրդ  
գրվածք  
աշխարհագրություն  
մաթեմատիկա  
հայրանակ**

աշխարհագրություն, բժշկություն, իրավունք, փիլիսոփայություն, տիեզերագիտություն և այլն:



Մատենադարանում պահվող ձեռագրերից յուրաքանչյուրը մարդկանց պես իր կենսագրությունն ունի: Պատմում են, որ գերի ընկած ձեռագրերի համար հայերը երբեմն գյուղեգյուղ, տնետուն ընկած փող են հավաքել, վճարել ու ձեռագիրն օտար ափերից տուն բերել: Հայ մարդիկ երբեմն իրենց կյանքի գնով են փրկել ձեռագրերը:

Բազում վտանգների միջով են անցել ձեռագրերը, մարդկանց նման գերի տարվել և հրից ու սրից փրկվելով՝ եկել, մեզ են հասել: Դրանք հայ ժողովրդի տառապանքների ու հաղթանակների, նրա ազատասեր ու ստեղծագործ ոգու վկաներն են:



### Հանելուկ

Հրաշք դաշտ է, ցանված դաշտ է,  
Երեկ, այսօր, դարեր առաջ,  
Բայց ամեն օր մեզ է տալիս  
Բարիքները իր ամբարած:

### Բնասարսիտություն



Այն տունը, որտեղ գրքեր  
չկան, նման է հոգուց զրկված  
մարմնի:



### Աիրեյի՛ ինչուհի

Պու երևի նկատեցիր, որ մեզ ծանոթ մարչան բառն աչարեղ գործածվել է ուրիշ իմաստով: Այո՛, հնում մարչան նշանակում էր «գիրք»: Ավելի ուշ այդ բառով սկսեցին անվանել մափուր թերթեր ունեցող այն գիրքը, որի մեզ զանազան բաներ են գրում: Աչարեղից էլ՝ բոլորիս փազ ծանոթ դպրոցական մարչանը կամ դասամարչանը:

Գիրեմ՛նիկ



## Բառերի գանձատուփ

1. Ի՞նչ է նշանակում **կյանքի գնով** բառակապակցությունը:
2. **Փող են հավաքել, վճարել ու ձեռագիրն օտար ասիերից տուն բերել** նախադասության մեջ ի՞նչ իմաստով է գործածվել **տուն** բառը:
3. Տեքստից դու՛րս գրիր գիտություն անվանող բառերը: Նրանց մեծ մասն ի՞նչ ընդհանուր բաղադրիչ ունի:
4. **Հորթ, գառ, ուլ**. զո՞ւն է սրանց ընդհանուր իմաստը:
5. **Թղթե** բառին տեքստի զո՞ բառն է կազմությամբ նման: Նույն ածանցով բառեր ասա:
6. Տեքստի նախավերջին հատվածում գտի՛ր այն բառերը, որոնք կազմվել են արմատի կրկնությամբ: Նման 1-2 բառ էլ ի՛նքդ ասա:



## Հարցերի և առաջադրանքների արկղիկ

1. Հնում մարդիկ ինչի՞ վրա էին գրում:
2. Ինչի՞ց էին պատրաստում մագաղաթը:
3. Մարդիկ առաջ ինչպե՞ս էին անվանում գրքերը:
4. Մատենադարանն ինչու՞ են անվանում նաև **ձեռագրատուն**:
5. Ինչպիսի՞ «կենսագրություն» ունեն Մատենադարանում պահվող ձեռագրերը: Պատմի՛ր այդ մասին:
6. Տեքստում ի՞նչ հատուկ գոյականներ կան:
7. Շարունակի՛ր ըստ նմուշի:

**Մարդիկ** - մարդկանց, **տղամարդիկ** - ....., **կին** - ....., **ոգի** – **ոգու, որդի** - ....., **այգի** - .....



## Պատմությունների և գրույցների զամբյուղ

1. Մատենադարանի մասին տեղեկություններ հավաքիր և մի փոքրիկ զեկուցո՞ւմ պատրաստիր:
2. Պատմի՛ր քո դպրոցի գրադարանի մասին: Ի՞նչ գրքեր ես սիրում կարդալ:





### Արեւի' Գիրունիկ

Մարենադարանի մասին փոքրիկ պեկուցում պիտի պարտաւորեմ: Ուշում եմ այն հետաքրքրական դարձնել: Ինչ կարող ես օգնել: Նախապես հայտնում եմ շնորհակալությունս:

Ինչուիկ

### Արեւի' բարեկամ

Քեզ եմ ուղարկում Երևանի Մարենադարանի «ամենա-ամենաներից» մի փանի տեղեկություն: Մարենադարանում պահվող ամենահին շեռագիր մարջանը՝ Մեհամոր Ավետարանը, գրվել է ՎՊ դարում:

Մարենադարանի ամենամեծ շեռագիր մարջանը կշռում է 27.5 կգ և ունի շուրջ 600 թերթ, որոնցից յուրաքանչյուրը պարտաւորված է մեկ հորթի կաշվից:

Ամենափոքր շեռագիրը լուսկու տուփի չափ է, կշռում է ընդամենը 19 գրամ: Նրա թերթերը պարտաւորված են նորածին մեկ ուլի կաշվից:

Ամենաշար շեռագիր Մարենադարանին նվիրել է հարություն հապարջանը (Նշու չորփից), շուրջ 400 մարջան: Ծղմեցուցիչ է, չէ՞:

Ինչուիկ զան, վարսահ եմ, որ մնացածը դու ինձի հագողութեամբ կանես:

Գիրունիկ



### Դադարի պահ

Մատենադարանի մուտքի առջև կանգնեցված են հայ նշանավոր գործիչների արձաններ: Ըստ գույների կարդա՛ նրանց անունները և որոշի՛ր, թե ովքեր են:




Մխիթար Թորոս Գոշ Գրիգոր Ֆրիկ Դոստին Մովսես Տաթևացի Անանիա Նորենացի Ժրավացի

մաթեմատիկոս մանրանկարիչ առակագիր պատմիչ փիլիսոփա բանաստեղծ



# ԽԱՉ-ՔԱՐ

Տատասկների, քարերի մեջ  
 Քամիների, արևի մեջ,  
 Ձյունների մեջ, շոգ ու տոթի,  
 Այսպես խոնարհ, այսպես ըմբոստ,  
 Այսպես փխրուն, այսպես շիտակ,  
 Այսպես խրթին ու այսպես պարզ  
 Կանգնել է ևս երկնքի տակ ...  
 Կանգնել է ևս արևի դեմ,  
 Որպես թախիժ ու խղճի սյուն,  
 Կանգնել է ևս դարերի դեմ,  
 Որպես խաչված գեղեցկություն ...



**խոնարհ  
 խրթին  
 խիղճ  
 ըմբոստ**

## Իմաստախոսություն

Հայրենիքի հողն ու ջուրն անուշ են:



Արեգի՛ Ափրեմ՛նիկ

Այս փոփրիկ բանասարտեղծությունից դուրս գրեցի չորս բառ և զրա բացատրությունները՝ **ըմբոստ** «անհնապանը, սպարամբ», **խրթին** «բարդ, հասկանալու համար դժվարին», **չիրակ** «ուղիղ, ձիղը, ձշմարիտ, արդարամիտ, այնիվ», **դասարան** «փղոյր խոտաբույս»:

Ինչուի՛



Արեգի՛ Ինչուի՛

Երկու բան ավելացնեմ միայն. **դասարան** բառը հաճախ հենց «փուղ» նշանակությամբ էլ գործածում են, չնայած ունենեմ նաև **փուղ ու դասարան** բառակապակցությունը:

Իսկ **չիրակ** բառը կարող է դրվել շար բառերի հետք, օրինակ՝ **չիրակ խոտ, մարդ** և այլն:

Ափրեմ՛նիկ



## Քառերի գանձատուփ

1. Գրիր **քամի**, **թախիժ**, **խոնարհ** և **դեմ** բառերի հոմանիշները:
2. Բանաստեղծության մեջ **հոմանիշ** և **հականիշ** բառերի մեկական զույգ գտիր:
3. Բանաստեղծությունից դու՛րս գրիր հատկանիշ ցույց տվող այն բառերը, որոնցով կարելի է բնութագրել նաև մարդկանց:
4. **Քար** արմատով երկուական բառ կազմիր:



## Հարցերի և առաջադրանքների արկղիկ

1. Ըստ բանաստեղծության ինչպիսի՞ն է խաչքարը:
2. Դու՛րս գրիր բնության երևույթներ և վիճակներ ցույց տվող բառերը: Քո կարծիքով դրանք ինչու՞ են գործածվել:
3. Բանաստեղծությունն ինչպիսի՞ տրամադրություն է առաջացնում ուրախ, թախճոտ, թե՛ ըմբոստ:
4. **Խիղճ** - **խղճի**, **երկինք** - **երկնքի** ձևերի նմանությամբ գրիր **երկիր**, **ձեռագիր**, **միտք**, **սիրտ** բառերի զույգերը:



## Պատմությունների և զրույցների զամբյուղ

1. Խաչքարերի մասին հետաքրքրական տեղեկություններ հավաքիր և ներկայացրու՝ գրավոր:
2. Նկարագրիր քո տեսած խաչքարերից մեկը:




## Իմաստունի օրատետրից

### Խաչքար

Խաչքարը հայկական մշակույթի յուրօրինակ գանձերից է:

Խաչքարեր կարելի է տեսնել գերեզմանոցներում, աղբյուրների և կամուրջների մոտ, վանքերում, եկեղեցիների մոտ: Պրանձ կանգնեցվել են տարբեր առիթներով՝ շինարարության ավարտի, հաղթանակի, մահվան: Մեր օրերում խաչքարը նաև պարզակոթող է:

Խաչքարի վրա խաչն է՝ մեր երկրի խորհրդանշաններով՝ խաղողի տունկ և ողկույց, նուռ, արև: Պրանձ կարծես ասեղնագործված լինեն:





## ՕՇԱԿԱՆՅԱՆ ՀՅՈՒՐԸՆԿԱԼՈՒԹՅՈՒՆ 1

Լեհաստանից մի լրագրող էր եկել: Միասին Օշական էինք գնացել՝ Մաշտոցի շիրիմը տեսելու: Երբ դուրս եկանք եկեղեցուց, իմ լեհ հյուրն ասաց.



- Քաղցած եմ:

- Գյուղում ռեստորան չկա, քսան-քսանհինգ րոպե պիտի համբերես, կհասնենք Երևան:

- Ուզում եմ այստեղ մի քիչ թափառենք փողոցներում, գերեզմանատուն գնանք, խաղողի այգիներ:

- Ուրեմն պիտի սոված մնաս:

- Չեմ կարող. եթե մայրս Վարչավայում իմանա, որ ես ժամը երեքին դեռ բան չեմ կերել, վաղը Երևան կգա: Մտի՛ր որևէ տուն, գոնե հաց ու պանիր առ, քայլելով կուտենք:

Եվ հանկարծ... Ես հացի հոտ առա: Գյուղում նոր թխած հացի հոտը հրավիրատոմս է:

Ահա երեսունհինգ-քառասուն տարեկան մի կին կարմրատակած կախվել էր թոնրի վրա: Կողքին նստած էր տասներկու տարեկան մի աղջիկ:

- Բարև, քույրիկ,- ասացի:

- Բարև, ախպեր ջան,- կիևը նայեց ինձ հազար տարվա ծանոթի պես:

Ես բացատրեցի, թե ինչո՛ւ եմ եկել, ասացի, որ հետս հյուր կա օտար երկրից, մի խոսքով՝ խնդրեցի մի քանի հաց ու, եթե կա, մի կտոր պանիր: Հետո էլ չամաչեցի ու ավելացրի.

- Ինչ որ պետք է, կտանք, քույրիկ ջան:

**որևէ  
հանկարծ  
խնդրել  
երեսունհինգ  
տասներկու**

Կինն ինձ ոչինչ չպատասխանեց, այլ դարձավ աղջկան.

- Հասմիկ, տատիկին կանչի, մի թռի՛, շու՛տ...

Աղջիկը թռավ, իսկ մեկ-երկու րոպե անց երևաց տատիկը՝ բարի դեմքով մի պառավ:

- Ներս կանչիր հյուրիդ, ախպեր ջան,- ասաց կինը՝ թոնրի մոտից վեր կենալով:



### Հանելուկ

Ափ անեմ,  
Ծափ անեմ,  
Տաք քարին  
Շըմփ անեմ:



### Քառերի գանձատուփ

1. Գրի՛ր *հոտ*, *խնդրել*, *հանկարծ* բառերի հոմանիշները:
2. Գրի՛ր *գալ*, *վաղը*, *քաղցած*, *վերջ*, *բարի*, *տալ* բառերի հակահիշները:
3. Բացատրի՛ր *հազար տարվա ծանոթ* բառակապակցությունը:



### Հարցերի և առաջադրանքների արկղիկ

1. Հեղինակը լեհ հյուրին ինչու՞ էր Օշական տարել:
2. Տեքստում տարվա ո՞ր եղանակն է նկարագրվում:
3. Գյուղի փողոցներն ինչու՞ էին համարյա դատարկ:
4. Տեքստում հայկական ի՞նչ դիմելաձևեր են գործածվել: Մեկ-երկուսն էլ դու՛ ավելացրու:
5. Եթե արտասահմանից հյուր ունենաք, նրան ու՞ր կտանեք:



### Պատմությունների և հեքիաթների զամբյուղ

1. Քո բնակավայրի մարդիկ հյուրասներ են: Պատմի՛ր:
2. Մի հեքիաթ պատմի՛ր, որտեղ բարի պառավ լինի:



## **Լեզվաբանի դասը**

**Հյուր - հյուրեր, այգի - այգիներ** գոյգերի բառերն ինչո՞վ են հակադրվում:

### **Գոյականի թիվը**

Գոյականները լինում են **եզակի** և **հոգնակի**:

**Եզակի** գոյականները ցույց են տալիս մեկ առարկա: Օրինակ՝ **երգ, ձուկ, ծաղիկ, երեխա**:

**Հոգնակի** գոյականները ցույց են տալիս մեկից ավելի միատեսակ առարկաներ: Օրինակ՝ **երգեր, ձկներ, ծաղիկներ, երեխաներ**:

**Հոգնակին** կազմվում է **-եր** և **-ներ** վերջավորություններով:

**Միավանկ գոյականների** հոգնակի թիվը կազմվում է **-եր** վերջավորությամբ: Օրինակ՝ **ծառ - ծառեր, ձի - ձիեր, տուն - տներ**:

Բացառություն են՝ **մարդ - մարդիկ, կին - կանայք**:

**Չուկ, մուկ, բեռ, լեռ, դուռ, գառ, հարս, եզ, թոռ, ծոռ, ծունկ, նուռ, ռուս** միավանկ բառերի հոգնակին կազմվում է **-ներ** վերջավորությամբ՝ **ձկներ, մկներ, բեռներ, լեռներ, դռներ, գառներ, հարսներ, եզներ, թոռներ, ծոռներ, ծնկներ, նռներ, ռուսներ**:

**Բազմավանկ գոյականների** հոգնակի թիվը կազմվում է **-ներ** վերջավորությամբ: Օրինակ՝ **փաթիլ-փաթիլներ, թռչուն-թռչուններ**:



## **Դադարի պահ**

Լուսանկարների շրջանակների գույների օգնությամբ ճանաչիր Հայաստանի տեսարժան վայրերը:

**Ամբերդ**

**Տաթևի վանք**

**Զվարթնոց**

**Գառնու տաճար**





## ՕՇԱԿԱՆՅԱՆ ՀՅՈՒՐԸՆԿԱԼՈՒԹՅՈՒՆ 2

Ես ձայն տվեցի լեհ հյուրիս՝ Վոյտեկին. մտածեցի, որ նրա համար հետաքրքիր կլինի: Իրոք, հետաքրքրեց: Երեխայի պես, բերանը բաց, նա նայում էր կարմրած թոնրին, հետո՝ կարմրող տատիկին, հետո՝ լավաշներին, որ ծովափին մերկացած մարդկանց պես կարծես արևի լոգանք էին ընդունում:

Տանտիրուհին քիչ անց դուրս եկավ կողքի սենյակից:

- Ներս մտեք, ախպեր ջան,- ասաց նա ինձ,- հայերեն գիտի՞ հյուրը...

- Չէ,- ասացի ես,- իրենց երկրում հայերեն չեն անցնում:

- Յան,- զարմացավ կինը:

Ներս մտանք: Գյուղական համեստ մի տուն էր: Սեղանին թթու էր դրած, հաց, պանիր, կարագ, մածուն, մուրաբա, լոբի: Վոյտեկը զարմացած նայում էր ինձ:

- Ուտենք, - ասացի:

Չգիտեմ, ամեն ինչ համո՞վ էր, թե՞ մենք էինք շատ քաղցած: Ինքնամոռացության մեջ ուտում էինք, երբ բակից տղամարդու ձայն լսեցի, ու ձայնն անմիջապես ներս մտավ: Բառասունին մոտ տղամարդ էր:

- Բարով եք եկել,- ասաց նա՝ ձեռքը մեկնելով,- միսը տվի, հիմի կրակին կդնեն:

Մի խոսքով՝ քիչ անց մեր կողքին թշշում էր մաճառը, իսկ սեղանին էլ տեղ ու դադար չկար: Վոյտեկն ուտում էր, խմում

և մեկ-մեկ զննող հայացքով նայում ինձ, հետո՝ տանտիրոջը:



**կարագ  
նախօրոք  
թշալ  
օղանավակայան  
խաբել**

Երևան հասանք, երբ արդեն գիշեր էր: Ամբողջ ձանապարհին Վոյտեկը պնդում էր, որ տանտերերն ինձ ձանաչում էին, որ ես նրանց հետ նախօրոք պայմանավորվել էի: Ես սկզբում ուշադրություն չէի դարձնում, բայց նա նույնը պնդեց նաև հաջորդ առավոտ: Նույնիսկ օղանավակայանում, երբ ես ձանապարհում էի նրան, ասաց.

- Լավ խաբեցիր, հա՛, Օշականում...

## Առած-ասացվածքներ

Աղ ու հաց, սիրտը բաց:

Հյուրը տանտիրոջ վարդն է:



### Բառերի գանձատուփ

1. Գրի՛ր գիշեր, հաջորդ և հետաքրքիր բառերի հականիշները:
2. Հետևյալ անուններից **-ացի**, **-եցի**, **-ցի** վերջածանցներով բառեր կազմիր.

*Օշական, Էջմիածին, Գորիս, Լոռի, Գավառ, Տավուշ, Գյումրի, Ջերմուկ, Կապան, Մեղրի, Վանաձոր, Վան:*

3. Դու գործածու՛մ ես **սխալեր**, **հա՛**, **յա՛**, **հիմի** բառերը: Եթե այո, ապա երբ և որտեղ:
4. Ի՛նչ են նշանակում **վեր կենալ**, **ձայն տալ**, **բերանը բաց**:



### Հարցերի և առաջադրանքների արկղիկ

1. Բնութագրի՛ր հեղինակին, լրագրողին և նրանց հյուրընկալող հայ գյուղացիներին:
2. Տանտերերն ի՛նչ հյուրասիրեցին անակնկալ հյուրերին:
3. Կարդացածիդ մեջ քեզ ի՛նչը դուր եկավ, իսկ ի՛նչը դուր չեկավ: Ինչո՞ւ:
4. Քո կարծիքով փոքրիկ աղջիկը հյուրերի հետ սեղան նստեց:
5. Քո կարծիքով այս պատմությունն իրական է, թե՛ հեղինակը հորինել է:



## Պատմությունների և գրույցների զամբյուղ

1. Դուք անակնկալ հյուր (կամ հյուրեր) ունեցել եք: Համառոտ գրիր այդ մասին:
2. Ո՞ր ընկերոջդ կամ ընկերուհուդ տանը հյուրընկալվելիս ես քեզ շատ լավ զգացել: Պատմիր այդ մասին:



## Իմաստունի օրատետրից

### Մածուն

Մածունի հայրենիքը համարվում է հայկական լեռնաշխարհը:

Մածունի գյուղը հալարամյակներ առաջ պարահաբար է արվել, երբ կաթը վերափոխվել է «թթու կաթի» մածունի: Այսօր էլ մածուն արանալու կամ մերելու եղանակը նույնն է մնացել:

Էռայրած (30-35 աստիճան) կաթի մեզ փչ փանակությամբ թթված մածուն խառնելով՝ մակարդում են կաթը: Խարկապետ 5-6 օրական մածունը հրաշալի դեղամիզոց է աղետարամոփսային հիվանդությունների, թունավորումների, ալյուրածֆների, խոցերի և ուռուցիների դեմ: Այն պարկերավոր անվանում են «ասարվածային կերակուր»:



## Տատիկի խորհուրդները

Վրոգրիկս, հյուրընկալությունը մեր ժողովրդի գեղեցիկ հարկանիշներից մեկն է:

Պու՛ էլ աշխարհը պահել հյուրասիրության հայկական ավանդույթները:


Քայքայում ու ժպիտում ընդունիր ժո րունն եկող հյուրին, զերմ ու հոգաբարձ եղիր նրա նկարմամբ: Անկեղծ սրտով նրա հետ կխփիր այն, ինչ ունես: Իհի՛ր, կարևորը ոչ թե սեղանի լիությունն է, այլ քանդիրոզ սրտաբացությունը:




## ԱՐԱԳ-ԱԾԻ ԱՂԲՅՈՒՐՆԵՐԸ



Որտեղից են աշխարհ գալիս  
 Աղբյուրները զրնգալից,  
 Գառների պես ժիր ու կայտառ  
 Ցատկոտում են ժայռերն ի վար,  
 Խոսք են բացում խոտերի հետ,  
 Ցողում ճամփան խայտաբղետ,  
 Ծիլ ու ծաղկին՝ տապից այրվող,  
 Նվիրում են կենարար ցող:  
 Կարկաչում ու գալարվում են,  
 Լանջերն ի վար գլորվում են,  
 Ծարավները մարում մարդկանց,  
 Ծիծաղում են ձայնով մանկան  
 Աղբյուր կոչվող զանգակները՝  
 Արագածի զավակները:



**աշխարհ  
աղբյուր**



### Հանելուկներ

Գիշեր-ցերեկ  
 Անվերջ հոսում,  
 Գիտի երգել,  
 Բայց չի խոսում:

Շոգից թև առավ,  
 Երկինք բարձրացավ,  
 Դարձավ ձյուն, անձրև,  
 Կրկին հետ դարձավ:  
 Ցրտին ձերմակած  
 Վերմակ է բացում,  
 Շոգին ծարաված  
 Ծուրթեր է թացում:

### Առածներ



Որ աղբյուրից մարդ ջուր խմի,  
 այն աղբյուրին քար չի գցի:

Աղբյուրը որ կեղտոտես, ջուր  
 որտեղից պիտի խմես:

**Օրհնանք**  
 Զրի նման երկար կյանք ունենաս:





Աիրելի՛ Գիրեմնիկ  
 Քանաստեղծության մեզ ինչ հեղափոխեց **կենսարար**  
**չող** բառակապակցությունը: Քառարանը բացեցի և իմացա,  
 որ **կենսարար** նշանակում է «կյանք, կենդանություն փոխել»:  
 Այստեղ հենց այդպես է. չողը կյանք է փայխս կիպիչ արևից  
 այրվող ծիլ ու ծաղկին: Գիրեմ, թե ի՞նչ լավ է. աշօր նոր  
 բառ սովորեցի:

Ինչուհի



### Բառերի գանձատուփ

1. Բանաստեղծության մեկ տողի մեջ հոմանիշ բառեր կան:  
 Գտիր դրանք:

2. Հոմանիշ բառերը դեմ դիմաց գրիր:

զավակ	գույնզգույն
խայտաբղետ	շոգ
տապ	առույգ
կայտառ	թռչկոտել
ցատկոտել	որդի

3. Կարդա՛ բանաստեղծությունը և որոշիր, թե ի՞նչ են նշանակում  
**աշխարհ գալ** և **խոսք բացել** բառակապակցությունները:



### Հարցերի և առաջադրանքների արկղիկ

1. Բանաստեղծության մեջ աղբյուրներն ինչերի՞ հետ են  
 համեմատվում:

2. Իրենց ճանապարհին աղբյուրներն ի՞նչ հանդիպումներ են  
 ունենում:

3. Աղբյուրներն ինչպե՞ս են ծիծաղում:

4. Բանաստեղծության մեջ գտիր հոգևակի գոյականները և  
 լրացրո՛ւ աղյուսակը:

<b>-եր</b> վերջավորությամբ բառեր	<b>-ներ</b> վերջավորությամբ բառեր



## Պատմությունների և հեքիաթների զամբյուղ

1. Արագածի մասին ի՞նչ կարող ես պատմել:
2. Հրաշք աղբյուրի մասին մի հեքիաթ հորինիր:



## Իմաստունի օրատետրից

### Արագած

Արագածը հայաստանի հանրապետության ամենաբարձր լեռն է (4090մ), հայկական լեռնաշխարհում՝ չորրորդը: շեռք մեծ փարածժ է պրադեցնում:

Արագածից են սկիզբ առնում Արագած, Ամբերդ, Մանթաշ, Աեղարոտ, Ծաղկահովիտ և այլ գետակներ: Կան 100-ից ավելի լճեր: Պրանցից ամենախոշորը քարի լիճն է, որը գրնվում է լեռան հարավային լանդին, 3200մ բարձրության վրա: Ջուրը պարզ է, մաժուր, սնվում է շնհալքի զրեից, ինչպես նաև սրորգեւրնյա աղբյուրներից:



Արագածը հարուստ է պարմական հուշարչաններով: հարավային լանդին է գրնվում Ամբերդ ամրոցը: Ինագույն բնակավայրերից է Բյուրականը, որտեղ գրնվում է Բյուրականի աշխարհահռչակ ասրղաղիրարանը:



## Դաղարի պահ

Ըստ գույների բառակապակցություններ կազմիր **ծիլ** ու **ծաղիկ** կապակցության օրինակով:

ծառ ու

պար

թուփ

երգ ու

հաց ու

ծաղիկ

սար ու

ծիծաղ

ծափ ու

ձոր

պակիր

տաղ



## ՓՈՔՐԻԿ ՀԱՅՐԵՆԱՍԵՐԸ 1

Մի անգամ Իսպանիայից դեպի Իտալիա ճանապարհվեց մի շոգենավ, որի վրա կային ֆրանսիացիներ, իտալացիներ, իսպանացիներ: Ուղևորների ամբոխի մեջ կարելի էր նկատել միայնակ, վատ հագնված տասնմեկամյա մի տղայի, որը վայրի գազանիկի նման մի կողմ էր քաշվել և մռայլ նայում էր շուրջբոլորը: Զարմանալի չէր, որ նա այդպես մռայլ էր նայում:

Երկու տարի առաջ հայրն ու մայրը՝ ծայրաստիճան **աղքատ** գյուղացիներ, նրան հանձնել էին թափառաշրջիկ կրկեսի տիրոջը: Տերը ծեծում ու կիսաքաղց էր պահում տղային, սովորեցնում զանազան աճաքարություններ: Հետո նրան տարավ Ֆրանսիա և Իսպանիա, որտեղ շարունակում էր ծեծել և կուշտ չկերակրել: Երբ տեսավ, որ այլևս հնարավոր չէ դիմանալ քաղցին ու ծեծին, քաղաք հասնելուն պես տղան փախավ իրեն ձնշողից և ներկայացավ իտալական դեսպանին՝ **օգնություն** խնդրելու:

Տղայի պատմությունից ու տեսքից ազդված՝ դեսպանը երեխային նստեցրեց Իտալիա մեկնող **շոգենավ** և ձեռքը տվեց մի նամակ՝ ուղղված ոստիկանության պետին: Նա

երեխային պետք է հանձնե՞ր ծնողների: **Խեղճ** տղան ցնցոտիների մեջ էր: Նրան մահճակալ հատկացրին ընդհանուր նավասենյակում: Ուղևորները նրան նայում էին մեծ հետաքրքրությամբ,



ոմանք **փորձում** էին հարցուփորձ անել, բայց նա չէր պատասխանում, կարծես **արհամարհում** ու ատում էր բոլորին. զրկանքներն ու ծեծն էին նրան այդպես ընկճված ու տխուր դարձրել: Ուղևորներից երեքին հաջողվեց հարկադրել, որ նա խոսի. տղան կցկտուր պատմեց իր պատմությունը:

Թեպետ և այդ երեք ճամփորդներն իտալացիներ չէին, բայց հասկացան նրան և մասամբ **խղճահարությունից**, մասամբ էլ նրանից, որ գինին նրանց տրամադրությունը բարձրացրել էր, տղային մի քանի մետաղադրամ տվեցին: Նրանք կատակում ու հրահրում էին տղային, որ էլի բաներ պատմի: Եվ քանի որ այդ ժամանակ նրանց էին մոտեցել ուրիշ ուղևորներ ևս, իրենց առատաձեռն ցույց տալու համար նրանք զրնգոցով նորից սեղանին էին նետում դրամներ՝ ասելով. «Ահա, վերցրո՛ւ»: Տղան վերցնում ու գրպանն էր դնում դրամները՝ կիսաձայն **շնորհակալություն** ասելով: Նա շարունակում էր զուսպ մնալ, միայն աչքերն էին պայծառացել ջերմ ժպիտից: Ապա բարձրացավ իր մահճակալին, վարագույրը քաշեց ու լռեց. միտք էր անում, թե ի՞նչ պետք է անի այդ դրամը:

### **Իմաստախոսություն**

*Օտար երկիրը հայրենիք չի դառնա:*

**ուղևոր  
հարցուփորձ  
կցկտուր**



### **Բառերի գանձատուփ**

**1. Տևցուտի, ընկճվել, ազդվել, աճպարարություն** բառերը բաց թողնված ո՞ր տեղերում պիտի գրվեն:

**ա)** Երբ մեկը որևէ դեպքից կամ պատմությունից հուզվում է, ասում են ..... է:

**բ)** Տեսել ես, թե մարդիկ ինչպե՞ս են ձեռքերի արագ շարժումներով զանազան ձարպիկ և անհավատալի հնարքներ ցույց տալիս: Դա ..... է:

**գ)** Մաշված, պատառոտված հագուստը ..... են անվանում:

**դ)** Երբ որևէ մեկը հոգսերից խեղճացած կամ հուսահատված է, ասում են՝ ..... է:

2. Ընտրիր և դեմ դիմաց գրիր հոմանիշ բառերը:

հրահրել	տխուր
հարկադրել	խոշոր, հսկայական
թախծոտ	խոժոռ
մեծ	գրգռել, դրդել
մռայլ	ստիպել, պարտադրել

3. Ընդ նախածանցով բառեր կազմիր: Նմուշ՝ ընդհանուր:

4. Ծարունակիր՝ բառերն ընտրելով տեքստում կապույտ գրվածներից: Ուշադրություն՝ն դարձրու բառերին արտասանությանը և գրությանը:

Նմուշ՝ արհամարհել - շնորհակալություն, ճանապարհվել (ր-ից հետո h է գրվում, որը թույլ է արտասանվում):

ա) հազնել, ..... բ) կեղտոտ ..... գ) բարձրացնել .....

5. Կրկեսի տիրոջը բնութագրելու համար հատկանիշ և գործողություն ցույց տվող բառեր գրիր:

Նմուշ՝ (ինչպիսի՞) ..... մարդ, որը (ինչ էր անում) .....



### Հարցերի և առաջադրանքների արկղիկ

1. Ո՞րն էր տղայի հայրենիքը: Ինչից իմացար:
2. Ի՞նչ ազգերի ներկայացուցիչներ էին շոգենավի ուղևորները:
3. Նավի վրա տղան ինչու՞ էր մռայլ:
4. Տղան ո՞ր երկրներում էր եղել:
5. Ծոգենավ նստելու համար ո՞վ օգնեց տղային:



### Պատմությունների և զրույցների զամբյուղ

1. Երբևէ ճամփորդել ես, պատմիր:
2. Մի պատմությունն հորինիր «Երբ ես նավապետ էի» կամ «Կախարդական գորգի վրա» վերնագրով:





## ՓՈՔՐԻԿ ՀԱՅՐԵՆԱՍԵՐԸ 2

Ամբողջ երկու տարի նա կուշտ հաց չէր կերել, իսկ այժմ շոգենավի վրա կարող էր կշտացնող մի կերակուր ուտել: Հետո, երբ հայրենիքում ափ իջներ, կազատվեր ցնցոտիներից ու նոր հագուստ կգներ: Եվ վերջապես, երբ այդքան փող տաներ տուն, հայրն ու մայրը թերևս այնքան խիստ չէին դիմավորի նրան, որքան եթե դատարկ գրպանով հայտնվեր: Ստացած փողը նրա համար մի ամբողջ կարողություն էր: Մինչ խորհում էր այդ մասին, այն երեք ուղևորները, նավասենյակի ճաշասեղանի շուրջը նստած, շարունակում էին զրուցել: Նրանք գինի էին խմում ու խոսում իրենց ճամփորդություններից, այն երկրներից, որտեղ եղել էին և խոսքից խոսք անցնելով՝ հասան Իտալիային:

Մեկն սկսեց գանգատվել նրա հյուրանոցներից, մյուսը՝ երկաթգծից, իսկ հետո բոլորը միասին տաքացան ու սկսեցին

հայիոյել մնացած ամեն ինչը: Մեկն ասաց,

թե գերադասում է ճամփորդել ուրիշ

երկրներում, մյուսը հայտարարեց,

թե Իտալիայում հանդիպել է միայն

խաբեբաների ու ավազակների,

երրորդն ավելացրեց, թե իտա-

լացի ծառայողներն անգրագետ

են:

- Անկիրթ ժողովուրդ է,-  
հաստատեց առաջինը:

- Կեղտոտ,- ավելացրեց  
երկրորդը:

- Գո...,- բացականչեց երրորդը:  
Նա ուզում էր ասել «գողեր են», բայց չհասցրեց խոսքն ավարտել. մետաղադրամների կար-



կուտ թափվեց գրուցակիցների գլուխներին և ուսերին: Ջրնագոցով սեղանին դիպչելով՝ դրամները ցած գլորվեցին: Երեքը զայրացած վեր թռան տեղներից, նայեցին վերև և մի բուռ դրամ ուղիղ երեսներին ստացան:

- Հեն վերցրեք ձեր փողերը,- արհամարհանքով ասաց տղան՝ ցած կախվելով վարագույրի հետևից,- ես ողորմություն չեմ վերցնում նրանցից, ովքեր վատաբանում են իմ հայրենիքը:

**իջևել  
ճամփորդություն  
խաբերա  
արհամարհանք**

## **Բնաստորություն**

Նետերը խոցում են մարմինը, իսկ չար խոսքերը՝ հոգին:



## **Բառերի գանձատուփ**

1. **Կարողություն** նշանակում է «որևէ բան անելու ուժ, հնարավորություն» և «հարստություն»: Բառը պատմվածքի մեջ զոր իմաստով է գործածվել (**Ստացած փողը նրա համար մի ամբողջ կարողություն էր**):

2. Ընտրիր և դեմ դիմաց գրիր հոմանիշ բառերը:

գանգատվել	չարախոսել, բամբասել, անարգել
դիպչել	վերջացնել
վատաբանել	կպչել, զարկվել
զայրանալ	բարկանալ, ջղայնանալ
ավարտել	դժգոհել, բողոքել

3. Փորձիր բացատրել **մետաղադրամների կարկուտ** և **դատարկ գրպանով** արտահայտությունները:



## **Հարցերի և առաջադրանքների արկղիկ**

1. Ինչպե՞ս կգնահատես տղայի արարքը: Իսկ դու՞ ինչպես կվարվեիր, եթե նրա տեղում լինեիր:

2. Տեքստից դու՛րս գրիր իտալացի տղային բնութագրող 4-5 բառ կամ արտահայտություն:

3. Տղային ինչպե՞ս ես պատկերացնում. նկարագրիր:

4. Ի՞նչ ես կարծում, հեղինակն ինչպե՞ս է վերաբերվում տղային և նրա արարքին:

5. Տեքստը բաժանիր մասերի և դրանք վերնագրիր:

6. Գրիր գիծ, գլուխ, երկիր, ժողովուրդ գոյականների՝ **ինչի՞** հարցին պատասխանող ձևերը: Նմուշ՝ **ձեռագիր** - (**ինչի՞**) **ձեռագրի**:



### Պատմությունների և գրույցների գամբյուղ

1. Ընկերներիդ հետ քննարկիր դեսպանի և երեք ճանապարհորդների արարքները: Լսիր ընկերներիդ և հայտնիր քո կարծիքը:

2. Պատմության համար ուրիշ ավարտ մտածիր:



### Լեզվաբանի դասը

«Փոքրիկ հայրենասերը» պատմվածքի առաջին մասում **տղա** բառը տարբեր ձևերով է գործածվել: Գտիր դրանք և դու՛րս գրիր:

#### Գոյականի ձևային փոփոխությունները

Գոյականները նախադասության մեջ տարբեր ձևափոխությունների են ենթարկվում: Այսպես:

Հայաստանը հայերի հայրենիքն է:

Հայաստանի մայրաքաղաքը Երևանն է:

Հայաստանին է կապված իմ սիրտը:

Ես սիրում եմ Հայաստանը:

Հայաստանից աշխարհի տարբեր երկրներ հանքային ջուր է արտահանվում:

Հայաստանով է անցել նշանավոր ճանապարհորդի ճամփան:

Հայաստանում ապրում են հայեր, եզդիներ, ռուսներ, ասորիներ, հույներ:

Այդ ձևերից յուրաքանչյուրը տարբեր դեր ունի նախադասության մեջ և տարբեր հարցերի է պատասխանում:



**Ա՛խ, ԻՆչ Լավ Են Սարի Վրա...**

Ա՛խ, ինչ լավ են սարի վրա  
Անցնում օրերն անո՛ւշ, անո՛ւշ,  
Անրջային, թեթևասահ,  
Ամպ ու հովերն անո՛ւշ, անո՛ւշ:

Ահա բացվեց թարմ առավոտ,  
Վարդ է թափվում սարին-քարին,  
Շաղ են շողում ծաղիկ ու խոտ,  
Շնչում բուրմուխք եղեմային:

Ա՛խ, ինչ հեշտ են սարի վրա  
Սահում ժամերն անո՛ւշ, անո՛ւշ,  
Շվին փչեց հովիվն ահա -  
Աղջիկն ու սերն անո՛ւշ, անո՛ւշ:



**թեթևասահ  
ամպ  
վարդ**

**Հանելուկներ**

Ամեն առավոտ  
Գոհար շուրթերով  
Տալիս է ծաղկանց  
Համբույրը իր զով:

Յնցուղի պես  
Փեշը բաց անում,  
Ձոր ու հանդեր է  
Հեռվից թաց անում:



Գիրունիկ զան,  
բանասարտեղծության մեզ  
երկու անհասկանալի բառ  
կա՝ *անրզային* և *երեւակաւն*:  
Պրանժ ականգիս մեղերու  
նման են հնչում:

Ինչուիկ զան, այդ  
բառերը սովորաբար  
բանասարտեղծություններում  
են հանդիպում: *Անուրզ*  
նշանակում է «հաճելի  
երապ»: Իեղբորոջսմբ կարող  
ենք եպրակայնեյ՝ *անրզային*,  
այսինքն՝ *երապային*:

*Երեւ* բառը *դրախտ*-ի հումանիշն է: Պարզ է, չէ՛,  
որ *երեւակաւն* նշանակում է «դրախտային»:





## Բառերի գանձատուփ

1. ա) Համեմատիր *հոտ* և *բուրմունք* բառերը: Իմաստային ի՞նչ տարբերություն կա նրանց միջև:

բ) Հոտ և բույր կամ բուրմունք բառերով երկուական բառակապակցություն կազմիր:

2. Ի՞նչը կարող է թարմ լինել:

3. Ի՞նչը կամ ո՞վ կարող է սահել:

4. Քո բառերով բացատրիր, թե ի՞նչ է շաղը:

5. Ծվի փշեղ, դաշնամուր նվագել և թմբուկ զարկել բառակապակցություններով մեկական նախադասություն՝ն կազմիր:



## Հարցերի և առաջադրանքների արկղիկ

1. Քո կարծիքով տարվա ո՞ր եղանակն է նկարագրված բանաստեղծության մեջ:

2. Այս բանաստեղծությունը երգվում է (երաժշտության հեղինակը ևս Հովհ. Թումանյանն է): Ո՞ր բառերն են մեղեդային դարձնում բանաստեղծությունը: Սովորիր երգել այս երգը:

3. Ուրիշ բանաստեղծություն՝ն գտիր, որի հիման վրա երգ է գրվել: Եթե կարող ես, երգիր:

4. Ի՞նչ գույներ ես տեսնում, երբ արտասանում (կամ երգում) ես այս բանաստեղծությունը:



## Պատմությունների և զրույցների զամբյուղ

1. Սարի վրա երբևէ եղել ես: Պատմիր այդ մասին:

2. Հովհաննես Թումանյանի մասին ի՞նչ գիտես: Պատմիր:



## Դադարի պահ

Կարդա՛ միևնույն գույնն ունեցող բառերը՝ նրանց միջև ու դնելով:

*ծառղաշտ սարծափ ծործաղիկանտառ ծիծաղ*





Ավետիք Իսահակյան

## ԱՋԳԱՅԻՆ ԵՐԳԸ 1

Աշնան մի պայծառ առավոտ էր. Արարատյան դաշտի հրաշագեղ աշունը: Փայլում էին խաղողի ոսկեղեն ողկույզները, նուռն ու խնձորներն ասես հրեղեն գնդակներ լինեին: Հուռթի այգիներից լիության անուշ բուրմունքն էր խնկում: Վերևում՝ բաց կապույտում, հավքերի շղթան էր ձգվում, ներքևում ցողապատ արահետներով հայ գեղջուկի սայլերն ու ձիերն էին անցնում՝ բարձած աշնան հազար ու մեկ բերքերով:

Երկու ընկերով գնում էինք հինավուրց Արմավիրի բլրի տակով: Մեր գլխի վրա ծփում էր սոսիների խորհրդավոր սոսափը: Երկուսս էլ լուռ էինք, տարված մեր մտքերով:

Քայլում էինք դեպի մի գյուղ՝ Երասխի ձախ ափին:

Սքանչելի է Արարատյան դաշտը:

Մասիսն ուղղակի դիմացներս էր. այնպես պարզ ու վճիտ էր, որ նրա ոտքերից մինչև գագաթը մեկ-մեկ կարելի էր դիտել: Մի հսկա սպիտակաբաշ առյուծի է նման նա՝ նստած հետևի ոտքերի վրա, ալևոր գլուխը անհունի մեջ, հանգիստ և անվրդով:

Աշնան քաղցր ու մեղմ արևը Մասիսի վերից վար և Արարատյան երկրի վրա իր ծիրանին էր փռել: Երեկոյան կողմ մտանք գյուղ:

**հուռթի  
գեղջուկ  
բարձել  
հինավուրց  
գաղտնի**

Հաջորդ օրը՝ մեկնելուց առաջ, գնացինք գյուղական գաղտնի դպրոցը: Ուսուցչի հետ արդեն երեկոյան ծանոթացել էինք. նա նույն գյուղից մի կրակոտ երիտասարդ էր:

Ցարական կառավարությունը փակել էր հայկական դպրոց-

ները: Հայ ժողովուրդը զրկվել էր ազգային կրթություն ստանալու հնարավորություններից: Հայ հայրենասեր անհատները մտածում էին որքան հնարավոր է հակազդել պետական քաղաքականությանը: Հայկական գավառներում սկսեցին համեստ միջոցներով գործել գաղտնի դպրոցներ:

**տարրական  
խորհրդավոր  
ողղակի  
քաղցր  
անվրդով**

Նախկին դպրոցների ուսուցիչներից ոմանք մնացին իրենց գյուղերում՝ նվիրվելով մանուկ սերնդի ազգային կրթությանը: Նրանք սովորեցնում էին գրել-կարդալ և թվաբանություն: Հետագայում այդ տարրական դպրոցների թիվը մեծացավ:

Այդպիսի դպրոցներից մեկն էր, որ մենք այցելեցինք:

Արաքսի ափին՝ հաստաբուն ընկուզենու տակ, հասարակ նստարանների վրա խումբ-խումբ տեղավորվել էին բավական մեծ թվով մանուկներ և պատանիներ:

## Ասույթ

*Իր մայրենի լեզուն վատ իմացողը կես մարդ է, չիմացողը՝ թշվառ, ծառից ընկած մի տերև, որ տարվում է ամեն մի պատահական քամուց:*

*Ստեփան Զորյան (հայ գրող)*



## **Բառերի գանձատուփ**

**1.** Բացատրիր *ոսկեղեն ողկույզներ ու նռան և խնձորի հրեղեն գնդակներ կապակցությունների մեջ գործածված ոսկեղեն և հրեղեն բառերը:* Այդ բառերով մեկական բառակապակցություն կազմիր:

**2.** Հուռթի այգիներից լիության անուշ բուրմունքն էր խնկում նախադասության մեջ մի բառ հոմանիշ է պտղաբեր, բերքառատ, փարթամ, բարեբեր բառերին: Ո՞րն է այն:

**3.** Գեղջուկ բառը նշանակում է «գյուղացի»: Մի բառով ինչպե՞ս կասես գյուղացի կին:

**4.** Վճիտ բառի երկու հոմանիշ ասա: Դրանցից յուրաքանչյուրով մեկական նախադասություն կազմիր:



Արեւի՛ գիրքեմնիկ  
 Աղնան արևը Արարարչան  
 երկրի վրա իր ծիրանին էր փոռ  
 նախարաստոյան մեզ ինչ պար-  
 մնայնում է ծիրանի բառը: Ծիրանի  
 հետ կապ կա:

Արեւի՛ ինչուի  
 Ծիրանի բառը  
 նշանակում է «կարմիր»,  
 «ծիրանագույն», այսինքն՝  
 ծիրանի գույն: Ծիրանի  
 է կոչվում նաև անթև շփեղ  
 թիկնույր՝ վերնապոստը, որ  
 կայսրերը, թագավորները հագնում էին  
 հանդիսավոր արարողությունների ժամանակ:  
 ինչու՞ է այդպես կոչվում: Որովհետև այն  
 ծիրանագույն էր լինում:



### Հարցերի և առաջադրանքների արկղիկ

1. Պատմվածքում նկարագրված ժամանակաշրջանում Հայաստանն անկախ էր: Ո՞ր նախադասության միջոցով կարող ես հիմնավորել կարծիքդ:
2. Պատմվածքում Մասիսն ինչպիսին է:
3. Գաղտնի գործող հայկական դպրոցներում ովքեր էին ուսուցիչ դառնում:
4. Քո բառերով արտահայտիր **Վերևում՝ բաց կապույտում, հավքերի շղթան էր ձգվում** նախադասության միտքը:
5. ա) Ի՞նչ հարցերի են պատասխանում **ընկուզենի, ընկուզենու, ընկուզենուց** ձևերը:  
 բ) Գրիր **ուկի** և **ոզնի** գոյականների՝ նույն հարցերին պատասխանող ձևերը:



### Պատմությունների և գրույցների զամբյուղ

1. Կրկին կարդա՛ Արարատյան դաշտի նկարագրությունը: Պատմիր քո բառերով՝ լրացնելով տարբեր տեղեկություններով:
2. Մասիսի կամ ուրիշ լեռան մասին մի ավանդույթու՛ն պատմիր:

## ԱՉԳ-ԱՅԻՆ ԵՐԳԸ 2



Օրը կիրակի էր: Գյուղը հանգստանում էր դաշտային աշխատանքներից, և այդ պատճառով դպրոցը լիքն էր աշակերտներով: Դպրոցը միայն մի ուսուցիչ ուներ, բայց ուսուցչի եռանդը հասնում էր ամեն տեղ: Մի խումբ «այբ ու բեն» էր սովորում, մյուս խմբում «Մայրենի լեզու» էին կարդում, երրորդ խմբում հայոց պատմությունից էին դաս պատասխանում, մի ուրիշ խմբում «Դավիթ Բեկ» էին կարդում:

Երբ դասը վերջացավ, ու աշակերտները պիտի ցրվեին, ընկերս, որ երգ շատ էր սիրում, խնդրեց ուսուցչին, որ աշակերտները մի երգ երգեն: Ուսուցիչը պատասխանեց, թե ինքը, դժբախտաբար, «բաղաձայն» է և դրա համար էլ երգ չի սովորեցրել, սակայն ավելացրեց, որ աշակերտների մեջ երգողներ կան:

- Լավ կլինի բոլորը գոնե մի ընդհանուր ազգային երգ գիտենան. օրինակ՝ «Մայր Արաքսի»-ն, որ շատ տեղին է, հենց նրա ափին ենք,- ասաց ընկերս:

Ուսուցիչը մի պահ մտածելուց հետո դարձավ աշակերտներին.

- Հապա՛, սիրելիներս, ամենքդ շարվեցե՛ք այստեղ:

Հետո դառնալով մեզ՝ ավելացրեց.

- Ինչպե՛ս չէ, գիտեն և լավը գիտեն:

Ու ձեռքի քանոնը վեր բարձրացնելով՝ գոչեց.

- Բոլորդ միասին ինձ հետ երգեցե՛ք՝ «Այբ-բեն-գիմ»: Չէ՛ որ բոլորիդ անգիր սովորեցրել եմ: Դեհ, այսպես:

Եվ քանոնի համաչափ շարժումներին ներդաշնակ՝ բոլորը, հետևելով ուսուցչին, սկսեցին բարձր և երգեցիկ ձայնով հեգել.

Այբ, բեն, գիմ,

Դա, եչ, զա,

Է, ըթ, թո...

**Երրորդ  
կուրծք  
հուժկու  
անպատճառ**

Այսպես միևնույն վերջ: Քառասուն-հիսուն կրծքից բխած այս հուժկու, բազմահնչյուն և միահամուռ ձայնը, որ ինքնին հայոց լեզուն է, Երասխի շառաչի հետ փոփելով Արարատյան աշխարհի վրա, թվում էր, թե սլանում է ազատ Մասիսն ի վեր:

Ամենքի երեսին պայծառ ժպիտ կար. ուսուցիչը շատ ոգևորված էր:

- Ահա՛ ձեզ մի ընդհանուր ազգային երգ, որ ամեն հայ անպատճառ պետք է գիտենա: Ահա չորս-հինգ տարի է՝ ես այդ երգն եմ սովորեցրել, ուրիշ երգ չեմ ձանաչում...,- բոցավառ շրթունքներով շնչասպառ ասաց ուսուցիչը և սրբեց քրտնած ձակատը:

- Շատ ճիշտ եք ասում և կեցցեք, իսկապես որ անևման էր,- ոչ նվազ ոգևորությամբ պատասխանեցինք մենք:

Ապա մեր շնորհակալությունը հայտնելով՝ ամուր սեղմեցինք հևարամիտ ուսուցչի ձեռքը և ուրախ ու թեթև շարունակեցինք մեր ուղին:

Մի պահ գտնվում էինք այդ տարօրինակ երգի ազդեցության տակ: Ընկերս խզեց լռությունը.

- Համաձայն չեմ, որ քանի հայն ապրում է, հայոց «այբ-բեն»-ը չի մեռնի:

- Այո՛,- ասացի,- բայց ես հակառակին ավելի համաձայն եմ. քանի հայոց «այբ-բեն»-ը ապրում է, հայը չի՛ մեռնի...

## Ասույթ

*Իմ կյանքի ամենամեծ երջանկությունը եղել է հայոց լեզվին տիրապետելը:*

*Վիկտոր Համբարձումյան (աշխարհահռչակ աստղագետ)*







## Բառերի գանձատուփ

1. Յու՛յց տուր գյուղական, ազգային բառերի արմատները և ածանցները: Յուրաքանչյուր ածանցով երեքական բան կազմիր:
2. Գրի՛ր ուրիշ, վերջանալ, խնդրել, գոչել և հուժկու բառերի հոմանիշները:
3. Գրի՛ր միասին, դժբախտաբար, ճիշտ, ուրախ և թեթև բառերի հականիշները:
4. Ուսուցիչը պատասխանեց, թե ինքը, դժբախտաբար «բաղաձայն» է նախադասության մեջ ի՞նչ է նշանակում չակերտներում գրված բառը:



## Հարցերի և առաջադրանքների արկղիկ

1. Ազգային ի՞նչ երգ երգեցին երեխաները:
2. Հեղինակը երեխաների երգածն ինչու՞ է «տարօրինակ երգ» անվանում:
3. Քո բառերով նկարագրի՛ր գյուղական դպրոցը, երիտասարդ ուսուցչին և երեխաներին:
4. Ո՞րն է պատմվածքի հիմնական միտքը:
5. Քո կարծիքով իր պատմության ընթացքում հայ ժողովուրդն ինչի՞ շնորհիվ է հաղթանակներ տարել: Կարծիքդ հիմնավորի՛ր:
6. Գրի՛ր լավ, ուրախ, պայծառ, թեթև ածականների համեմատության աստիճանները:



## Պատմությունների և գրույցների զամբյուղ

1. Գրավոր նկարագրի՛ր քո ուսուցչին:
2. Ներկայացրու՛ քո սիրած բանաստեղծությունը կամ երգը, հեղինակի և ստեղծագործության մասին տեղեկություններ հաղորդի՛ր ընկերներիդ:



## Լեզվաբանի դասը

Կարդա՛ «Ազգային երգը» պատմվածքի առաջին մարը և ցույց տուր այն բառերը, որոնք **ինչպիսի՞** հարցին են պատասխանում:

### Ածական. համեմատության աստիճանները

Առարկայի հատկանիշ ցույց տվող բառերը կոչվում են **ածականներ**:

Ածականները պատասխանում են **ինչպիսի՞** և **ո՞ր** հարցերին: Օրինակ՝ **քաղցր** (խաղող), **փայլուն** (աստղ), **մեծ** (գյուղ), **դաշտային** (ծաղիկ), **հայկական** (երգ) և այլն:

Որոշ ածականների ցույց տված հատկանիշը տարբեր առարկաների մեջ տարբեր չափով է լինում: Օրինակ՝ երկնքում մի աստղը կարող է **ավելի փայլուն** լինել, քան մյուսը: Կարելի է տեսնել նաև երկնքի **ամենափայլուն** աստղը:

Հատկանիշի տարբեր չափը ցույց ենք տալիս ածականի **համեմատության աստիճանների** միջոցով. **մեծ** - **ավելի մեծ** - **ամենամեծ**, **քաղցր** - **ավելի քաղցր** - **ամենաքաղցր**:



## Իմաստունի օրատեսրից

### Հայաստանի Հանրապետության օրհներգը

Քոչոր պետություններն ունեն պետական օրհներգ (այն հանդիսավոր երգ է): Օրհներգը, ինչպես դրոշը և պինանդանը, պետության պաշտոնական խորհրդանիշն է:

Իսլամական հանրապետության օրհներգի բառերը գրել է բանաստեղծ Միֆայել Նալբանդյանը, երաժշտական մշակումը կատարել է երգահան Քարսեղ Կանաչյանը:



## Դադարի պահ

Հայ երգի Մեսրոպ Մաշտոց



Կոմիտաս

# Իմ տեղեկատուն 1

**Բազմիմաստ** են կոչվում այն բառերը, որոնք մեկից ավելի իմաստներ են արտահայտում:

**մեծ**

1. «խոշոր» (**մեծ քար**),
2. «նշանավոր, անվանի» (**մեծ գրող**)

**Ուղիղ իմաստ** է կոչվում բառի հիմնական՝ սովորական իմաստը:

**ոսկի** «դեղին գույնի թանկարժեք մետաղ»

**Փոխաբերական իմաստ** է կոչվում բառի ոչ սովորական իմաստը:

**ոսկի** «ազնիվ, լավ»  
Պետրոսը **ոսկի** մարդ է:

**Հումանիշ** են կոչվում մոտ իմաստ արտահայտող բառերը:

**փայլել – շողալ**

**Հակահիշ** են կոչվում հակառակ իմաստ արտահայտող բառերը:

**թեթև – ծանր**

**Բառի բաղադրիչներ** են կոչվում բառը կազմող մասերը՝ արմատը և ածանցը:

**համաշխարհային համ/աշխարհ/ային**

**Արմատ** է կոչվում բառի հիմնական իմաստն արտահայտող մասը:

**հյուր, հյուրանոց, հյուրասեր**

**Ածանց** է կոչվում այն մասնիկը, որը միանում է բառի սկզբից կամ վերջից և նոր իմաստ է տալիս բառին:

**դժգույն, գունավոր**

**Նախածանցը** բառի սկզբից ավելացող ածանցն է:

**անօգուտ**

**Վերջածանցը** բառի վերջից ավելացող ածանցն է:

**դասարան**

**Հոդակապը** բառի տարբեր մասերն իրար միացնող **ա** ձայնավորն է:

**զարդատուփ**

**Պարզ** են կոչվում այն բառերը, որոնք կազմված են միայն մեկ արմատից:

**մարդ, օր, արև, ծառ, լույս**

**Բարդ** են կոչվում այն բառերը, որոնք կազմված են մեկից ավելի արմատներից:

**ծովափ (ծով+ափ)**  
**խաղաղաշտ (խաղ+ղաշտ)**

**Ածանցավոր** են կոչվում այն բառերը, որոնք կազմված են արմատից և մեկ կամ ավելի ածանցներից:

**անվախ (ան+վախ), բույրիկ (բույր+իկ), դժգոհություն (դժ+գոհ+ություն)**

**Բարդ ածանցավոր** են կոչվում այն բառերը, որոնք կազմված են մեկից ավելի արմատներից և առնվազն մեկ ածանցից:

**մայրաքաղաքային**  
(մայր + քաղաք+ային)

**Գոյական** են կոչվում առարկա (անձ, իր, կենդանի, երևույթ) ցույց տվող բառերը:

**մարդ, Տիգրան, գիրք, ձի, անձրև**

**Հասարակ անուն** է կոչվում միատեսակ բոլոր առարկաներին տրվող ընդհանուր անունը:

**քաղաք, բնակիչ, շուն, բամբ**

**Հատուկ անուն** է կոչվում միատեսակ առարկաներից ամեն մեկին տրվող առանձին անունը:  
Հատուկ անունները գրվում են մեծատառով:

**Երևան, Օջական, Վարդան Մամիկոնյան, Շեկո**

**Անձ ցույց տվող** գոյականներ են կոչվում **հմվ** հարցին պատասխանող գոյականները: Սրանք մարդկանց հատուկ և հասարակ անուններն են:

**տղա, աղջիկ, բժիշկ, վարորդ, Մեսրոպ, Այծեմնիկ, Թումանյան**

**Իր ցույց տվող** գոյականներ են կոչվում **ինչ** հարցին պատասխանող գոյականները: Սրանք իրեր, երևույթներ և կենդանիներ անվանող գոյականներն են:

**գիրք, անձրև, կառու, ձի**

Գոյականի **եզակի թիվը** ցույց է տալիս մեկ առարկա:

**վարդ, երեխա, գառ**

Գոյականի **հոգնակի թիվը** ցույց է տալիս մեկից ավելի միատեսակ առարկաներ:

**վարդեր, երեխաներ, գառներ**

Նախադասության մեջ գոյականը տարբեր ձևափոխությունների է ենթարկվում:

**քաղաք, քաղաքը, քաղաքի, քաղաքին, քաղաքից, քաղաքով, քաղաքում**

**Ածական** են կոչվում առարկայի հատկանիշ ցույց տվող բառերը:

**կարմիր, քարե**

**Ածականի համեմատության աստիճանները** ցույց են տալիս նույն հատկանիշի տարբեր չափը առարկաների մեջ:

**մեծ, ավելի մեծ, ամենամեծ**

**Թվական** են կոչվում առարկաների թիվ և թվային կարգ (հերթականություն) ցույց տվող բառերը:

երկու, քսանչորս, հարյուր մեկ, երկրորդ, չորրորդ, հինգերորդ

**Բայ** են կոչվում գործողություն ցույց տվող բառերը:

երագել, խաղալ

**Բայը** ցույց է տալիս խոսողի, խոսակցի կամ մի ուրիշ առարկայի կատարած գործողություն և ունի առաջին, երկրորդ և երրորդ դեմք:

սովորում եմ  
սովորում ես  
սովորում է

Բայի **եզակի թիվը** ցույց է տալիս մեկ առարկայի կատարած գործողություն:

գրում եմ, գնալու ես, ժպտաց

Բայի **հոգնակի թիվը** ցույց է տալիս մեկից ավելի առարկաների կատարած գործողություն:

գրում եք, գնալու եք, ժպտացին

**Ներկա ժամանակը** ցույց է տալիս խոսելու պահին կատարվող գործողություն:

սովորում եմ, սովորում եք

**Անցյալ ժամանակը** ցույց է տալիս խոսելուց առաջ կատարված գործողություն:

սովորել եմ, սովորեցիք, սովորում էին, տեսան

**Ապառնի ժամանակը** ցույց է տալիս խոսելուց հետո կատարվելիք գործողություն:

սովորելու եմ, կսովորեն, պիտի սովորեք

**Օժանդակ բայը** մասնակցում է բայի տարբեր ձևերի կազմությանը: Ունի ներկա և անցյալ ժամանակներ, եզակի և հոգնակի թիվ, դրական և ժխտական ձևեր:

հարգում եմ, տեսնելու ես, ժպտում է, կատակում էի, հարցրել էիր, կանչելու եր, չեմ խոսում, չես գնալու, չի հիշում, չէինք կատակում

**Բայի դրական ձևերը** ցույց են տալիս, որ գործողությունը կատարվել է, կատարվում է կամ կատարվելու է:

կանչել եմ, կանչում ես, կանչելու են, կանչեցին, կանչեն, կկանչեն, պիտի կանչեն

**Բայի ժխտական ձևերը** ցույց են տալիս, որ գործողությունը չի կատարվել, չի կատարվում կամ չի կատարվելու:

չեմ կանչել, չես կանչում, չեն կանչելու, չկանչեցին, չկանչեն, չպիտի կանչեն, մի կանչիր



**Քառակապակցությունը** առարկա և հատկանիշ կամ գործողություն և հատկանիշ ցույց տվող բառերի կապակցություն է:

**Դարձվածք է** կոչվում այն կայուն բառակապակցությունը, որի իմաստն ուղղակի կապ չունի այդ բառակապակցությունը կազմող բառերի իմաստների հետ:

**Նախադասությունը** ցույց է տալիս առարկան և նրա կատարած գործողությունը:

Նախադասության գլխավոր անդամներն են **ենթական** և **ստորոգյալը**:  
**Ենթական** ցույց է տալիս գործողություն կատարող **առարկան**:  
**Ստորոգյալը** ցույց է տալիս ենթակայի կատարած **գործողությունը**:

**Կոչական** է կոչվում այն բառը, որ ցույց է տալիս, թե ո՛ւմ կամ ինչի՞ն է ուղղվում խոսքը:

**Պարզ համառոտ նախադասությունը** կազմված է միայն ենթակայից և ստորոգյալից:

**Պարզ ընդարձակ նախադասությունը** կազմված է ենթակայից, ստորոգյալից և այլ բառից կամ բառերից:

**Պատմողական** է այն նախադասությունը, որով ինչ-որ բան են պատմում:

**Հարցական** է այն նախադասությունը, որով հարցնում են մի բանի մասին:

**Հրամայական** է այն նախադասությունը, որով հրամայում, խնդրում կամ հանձնարարում են մի բան անել:

**Բացականչական** է այն նախադասությունը, որով ուրախությունը, տխրությունը, ցավն արտահայտում են բացականչությամբ:

**Կապույտ երկինք ուշադիր կարդալ**

**գլխի ընկնել** «կռահել, հասկանալ», **աշխարհով մեկ լինել** «շատ ուրախանալ, ցնծալ»

**Ճնճողուկը ծվվում է:**  
**Պապիկը թերթ է կարդում:**

**Ճնճողուկը ծվվում է:**  
**Պապիկը կարդում է:**

**Արտանկ, օգևիր ընկերոջդ:**  
**Առվանկ, այսօր ինչու՞ ես այդքան ուրախ:**

**Թռչունները երգում են:**  
**Տատիկը ժպտում է:**

**Թռչուններն ուրախ երգում են:** Իմ տատիկը մեղմ ժպտում է:

**Իմ ընկերը հաղթել է** սկարիչների մրցույթում:

**Հայաստանը քանի՞ մարզ ունի:**

**Պատմիր քո սիրած հեքիաթը:**

**Ի՞նչ ուրախ էին օրերը Սևանի ափին:**

## Իմ տեղեկատուն 2

**Հանելուկը** մի քանի տողով նկարագրում է առարկան կամ երևույթը՝ առանց անունը տալու, և այդ նկարագրությունից մարդիկ գուշակում են առարկայի անունը:

Հանելուկները լինում են ժողովրդական և հեղինակային:

**Առածն** ու **ասացվածքը** խոր իմաստ ունեցող խրատական կարճ արտահայտություններ են, որոնք սովորեցնում են լինել ազնիվ, բարի, խելացի, հայրենասեր, ծնողասեր, աշխատասեր և այլն: Առածներն ու ասացվածքները ստեղծել է ժողովուրդը: *Օրինակներ՝ Գյուղ կանգնի, գերան կկոտրի: Հավատարիմ ընկերը գին չունի:*

**Հեքիաթը** բարի ու գեղեցիկ ավարտ ունեցող պատմություն է, որի մեջ մարդիկ արտահայտում են իրենց երազանքներն ու ազնիվ ցանկությունները:

Հեքիաթների հերոսներ են լինում մարդիկ, բույսերը, կենդանիները, երևակայական հրեշները, վիշապները:

Հին ժամանակներում հեքիաթները հորինել են սովորական մարդիկ և բանավոր պատմել իրար: Այդպիսի հեքիաթները կոչվում են ժողովրդական, օրինակ՝ «Ուս ուսի որ տանք, սարեր չուր կտանք» (հայկական), «Յոթ փայլուն աստղերը» (հնդկական):

Հեքիաթներ են գրել նաև գրողները: Դրանք կոչվում են հեղինակային հեքիաթներ: Հայտնի հեքիաթագիրներ են Հովհ. Թումանյանը, Ղ. Աղայանը, Գրիմ եղբայրները, Անդերսենը, Պուշկինը:

**Պատմվածքը** ոչ ծավալուն ստեղծագործություն է, որի մեջ հեղինակը իրական դեպքեր է պատմում մարդկանց և կենդանիների կյանքից: Օրինակ՝ Վ. Աևանյան, «Որսորդի սիրտը»:

**Ավանդությունը** ոչ իրական պատմություն է, որի միջոցով մարդիկ փորձել են բացատրել, թե հնում ինչպես են առաջացել լեռներն ու ձորերը, ծովերն ու գետերը, ինչու՞ են քաղաքներին, գյուղերին, բերդերին ու վանքերին այդ անունները տվել և այլն: Օրինակ՝ Հ. Խաչատրյան, «Ասք լավաշի մասին»:

**Վիպերգը** ժողովրդի կյանքի, թշնամիների դեմ նրա պայքարի, ազատասիրության և երազանքների մասին պատմող ստեղծագործություն է: Վիպերգը ստեղծվել է հին ժամանակներում և առանձին հեղինակ չունի. այն ժողովրդական ստեղծագործություն է: Աշխարհի շատ ժողովուրդներ իրենց վիպերգերն ունեն:

Հայկական վիպերգը կոչվում է «Սասնա ծռեր» կամ «Սասունցի Դավիթ»: Հետագայում գրողները մշակել են վիպերգերը և դրանց հիման վրա ստեղծագործություններ գրել, օրինակ՝ Հովհ. Թումանյան, «Սասունցի Դավիթ»:

**Առակը** ոչ ծավալուն ստեղծագործություն է, որը խրատում ու դաստիարակում է ընթերցողներին: Նրա մեջ գովաբանվում են ազնվությունը, արդարությունը, համեստությունը, և այլն, ծաղրվում են պարծենկոտությունը, ծուլությունը, չարությունը և այլն:

Առակի հերոսներ են լինում կենդանիները, բույսերը, բնության երևույթները, որոնք հանդես են գալիս մարդկանց փոխարեն: Օրինակ՝ Վարդան Այգեկցի, «Առյուծը, գայլը և աղվեսը», Մ. Կորյուն, «Սեխի թուփն ու ընկուզենին»:

**Բանաստեղծությունը** հատուկ ձևով՝ չափով գրված ստեղծագործություն է, որի մեջ հեղինակն արտահայտում է իր հույզերն ու մտքերը հայրենի երկրի, մարդկանց ու բնության մասին: Օրինակ՝ Ս. Կապուտիկյան «Տղայիս»:

## Ուղղագրական բառարան

աղջիկ	արձան	եղևի	ժողովուրդ
աղտոտել	արյուն	երբեմն	իբր
աղքատ	արջ	երբեք	իբրև
Ամանոր	արտասանել	երգ	ինևսուն
ամանորյա	արտասվել	երդում	ինևսունինը
ամբողջ	արցունք	երեսուն	իջևել
ամեն ինչ	արև	երթ	իջևանատուն
ամպ	արևելք	երկրորդ	ի վերջո
այդպես	արևմուտք	երջանիկ	լվացք
այլևս	բազկաթոռ	երրորդ	լուսավոր
այծյամ	բախտ	զարդարել	լուցկի
այսօր	բանալի	զարթնել	խաբեբա
անբիծ	բարձ	զգույշ	խաբել
անգամ	բարձր	զգուշություն	խախտել
անդադար	բարձունք	զեփյուռ	խարույկ
անընդհատ	բարօրություն	զմրուխտ	խեղդել
անպատճառ	բաց կապույտ	զուգել	խեղճ
անվերջ	բերք	էակ	խեցգետին
անվրդով	բզզոց	ըմբոստ	խիղճ
անցորդ	բռունցք	ընդամենը	խնդրել
անօգնական	բույն	ընդարձակ	խշշալ
անօգուտ	գաղտնիք	ընդդեմ	խոնարհ
աշխարհ	գգվել	ընդհակառակը	խորդուբորդ
աշխույժ	գդալ	ընդհանուր	խորհել
ապառաժ	գեղջուկ	ընդունակ	խորհրդավոր
առաջ	գյուղեգյուղ	ընդունել	խորհուրդ
առաջին	գոգ	ընթերցել	խրոխտ
առյուծ	գոռգոռալ	ընթրիք	խցկել
առողջ	գորշ	ընկուզենի	խփել
առջև	գրվածք	ընձուղտ	ծախսել
ասացվածք	զցել	թագավոր	ծածկել
ավագ	գունավոր	թախիծ	ծաղկեփունջ
ավտոմեքենա	դադար	թախտ	ծարավ
արգելել	դաստիարակել	թանկանալ	ծիածան
արդար	դարպաս	թաքցնել	ծոծրակ
արդեն	դդում	թեթև	կապուտաչյա
արդյոք	դեղձ	թերթ	կարագ
արթնանալ	դեղորայք	թռչուն	կարգ
արծիվ	դրախտ	թրջվել	կարդալ
արհամարհանք	եղբայր	թուղթ	կեղծավոր
արձագանք	եղջերու	թունավոր	կենդանի
արձակել	եղջյուր	ժայթքել	կեսգիշեր
արձակուրդ			

կեսօր  
կեցցեն, կեցցես  
կնճիթ  
կողք  
կորցնել  
կրիա  
կրծել  
կցկտուր  
կուրծք  
հագնել  
հագուստ  
հակառակորդ  
հաղթանակ  
հաղթել  
հաղորդել  
համարձակ  
համարյա  
համբույր  
համբուրել  
հայացք  
հանկարծակի  
հաջորդ  
հավաքել  
հարձակում  
հարյուր  
հարցուփորձ  
հարևան  
հափշտակել  
հեծկլտալ  
հերթ  
հեքիաթ  
հիանալ  
հինավուրց  
հիսուն  
հոգի  
հոգնել  
հոգս  
հորթ  
հպարտ  
հրթիռ  
հրձվանք  
հուժկու  
հուռթի  
հևալ  
հևիհև

ձագ  
ձգել  
ձյուն  
ճամփորդ  
ճանապարհ  
ճանձ  
ճեղք  
ճկույթ  
ճյուղ  
մաթեմատիկա  
մատյան  
մարգարիտ  
մարմարյա  
մեղք  
մեն-մենակ  
մեջ  
միանգամից  
միմյանց  
մինչև  
միջև  
միրգ  
մինևույն  
մխրձել  
մղկտալ  
մյուս  
մնացորդ  
մրջյուն  
մրցել  
մուգ կարմիր  
յոթանասուն  
յուրաքանչյուր  
նախընտրել  
նախշուն  
նախքան  
նախօրոք  
նեղվածք  
նրբաթերթ  
նրբանցք  
նուրբ  
շաբաթ  
շագանակ  
շղթա  
շյուղ  
շնորհակալ

շնորհք  
շոգ  
շուրջբուրբը  
ոգի  
ողբալի  
ողկույզ  
ողջ  
ողջույն  
ոչխար  
ոչ մի  
ոչ ոք  
ոռոգել  
որդի  
որովհետև  
որպեսզի  
որջ  
որսորդ  
որևէ  
չէ  
չորրորդ  
պաշտպանել  
պառկել  
պատշգամբ  
պարապմունք  
պղպեղ  
պողպատ  
ջարդել  
սաղարթ  
սանդուղք  
սարյակ  
սեղմել  
սերկկիլ  
ստեղծել  
սուրբ  
սփոփել  
սևանալ  
վագր  
վագք  
վաթսուն  
վախկոտ  
վախճան  
վայրէջք  
վարդ  
վերադարձ

վերելք  
վերջ  
վերջիվերջո  
վերք  
վրձին  
տախտակ  
տասնմեկ  
տարերք  
տարեցտարի  
տարրական  
տարօրինակ  
տիեզերք  
տնօրեն  
րոպե  
ուխսուն  
ուղեկցել  
ուղիղ  
ուղղակի  
ուղղել  
ուղղություն  
ուղևոր  
ուս ուսի  
ուրբաթ  
փախչել  
փարթամ  
փթթել  
փոխադարձ  
փոխհատուցել  
փորձ  
փրփուր  
քաղցած  
քաղցր  
քառասուն  
օգնել  
օգուտ  
օդ  
օդանավ  
օվկիանոս  
օրեցօր  
օրորել  
օրորոց  
օրհներգ  
օրնիբուն  
օր օրի



# ԲՈՎԱՆԴԱԿՈՒԹՅՈՒՆ

## Լեզվաբանի դասը

<b>1. ՈՒՄՆՎԻՐԵՄ ԻՄ ՍԻՐՏԸ</b>	3
<i>Ս. Մորառայան, ՅՈԹ ՍՐԲՈՒԹՅՈՒՆ</i>	3
<b>ԼԱՎ ԸՆԿԵՐԸ</b> ( <i>ըստ Աստվածաշնչի</i> )	4
1.....	4
2.....	7
<i>Ն. Էբրահիմի, ՈՒՄ ՆՎԻՐԵՄ ԻՄ ՓՈՔՐԻԿ ՍԻՐՏԸ</i>	10
<i>Հովի. Ծիրազ, ՀԱՅՐՍ</i>	15
<i>Դ. Ուկրեբա-Գրիգորյան, ՄՈՐ ԺՊԻՏԸ</i>	18
<i>Էդ. դե Ամիչիս, ՄՈՐ ՆԱՄԱԿԸ</i>	20
<i>Ս. Կապուտիկյան, ՏՂԱՅԻՍ</i>	23
<i>Ս. Մկրտչյան ԹԱԳԱՎՈՐՆ ՈՒ ՀՈՂԱԳՈՐԾԸ</i>	25
<i>Հ. Սահյան, ՊԱՊԸ</i>	28
<b>ԾՆԻԿԸ</b>	31
<i>Պ. Խաչատրյան, ԾԱՌԻ ԽՆԴՐԱՆՔԸ</i>	34
<i>Ն. Միքայելյան, ՄԱՅՐ ՀԱՅԱՍՏԱՆ</i>	36
<b>2. ՀԱՅՐԵՆԻ ԵՐԿԻՐ</b>	39
<i>Պ. Խաչատրյան, ՀԱՅԱՍՏԱՆ</i>	39
<i>Ս. Խերանյան, ՍԱՍՈՒՆՅԻ ԴԱՎԻԹ 1</i>	42
ՍԱՍՈՒՆՅԻ ԴԱՎԻԹ 2	46
<b>ՄԱՏԵՆԱԴԱՐԱՆ</b>	49
<i>Վ. Դավթյան, ԽԱԶՔԱՐ</i>	53
<i>Վ. Պետրոսյան, ՕԵԱԿԱՆՅԱՆ ՀՅՈՒՐԸՆԿԱԼՈՒԹՅՈՒՆ</i>	
1.....	55
2.....	58
<i>Հ. Արթենյան, ԱՐԱԳԱԾԻ ԱՂԲՅՈՒՐՆԵՐԸ</i>	61
<i>Էդ. դե Ամիչիս, ՓՈՔՐԻԿ ՀԱՅՐԵՆԱՍԵՐԸ 1</i>	64
2	67
<i>Հովի. Թումանյան, ԱՆԽ, ԻՆՉ ԼԱՎ ԵՆ ՍԱՐԻ ՎՐԱ</i>	70
<i>Ավ. Իսահակյան, ԱԶԳԱՅԻՆ ԵՐԳԸ 1</i>	72
2	75
<b>Իմ տեղեկատուն</b>	79
<b>Իմ տեղեկատուն</b>	83
<b>Ուղղագրական բառարան</b>	85

Բառերի կազմությունը (9)  
 Բառի ուղիղ և փոխաբերական իմաստներ (17)  
 Գոյական. անձ և իր ցույց տվող գոյականներ (35)  
 Գոյական. հատուկ և հասարակ (45)  
 Գոյականի թիվը (57)  
 Գոյականի ձևային փոփոխությունները (69)  
 Ածական. համեմատության աստիճանները (78)

### Իմաստունի օրատեսրից

Հայաստանի Հանրապետության դրոշը (38)  
 Հայաստանի Հանրապետության զինանշանը (41)  
 Սասնա ծռեր (45)  
 Խաչքար (54)  
 Մածուն (60)  
 Արագած (63)  
 Հայաստանի Հանրապետության օրհներգը (78)

### Իմաստունի և Տառիկի խորհուրդները

սեր և հոգատարություն մերձավորի և ուրիշների նկատմամբ (14)  
 աշխատասիրություն (30)  
 հոգատար վերաբերմունք շրջակա աշխարհի, մարդկանց և կենդանիների նկատմամբ (38)  
 հյուրընկալություն (60)

**Դավիթ Սևանի Գյուրջինյան  
Նարինե Հակոբի Հեքեքյան**

**ՄԱՅՐԵՆԻ**

**Հանրակրթական դպրոցի  
4-րդ դասարանի դասագիրք  
Մաս 1**

(երրորդ, վերամշակված հրատարակություն)

**Հաստատված է ՀՀ կրթության և գիտության  
նախարարության կողմից**

**Խմբագիր՝**

**Նկարիչ՝**

**Համակարգչային ձևավորումը՝**

**Դ. Գյուրջինյան**

**Ս. Այվազյան**

**Ա. Օհանջանյանի**

**Չափսը՝ 70x100 1/16: Թուղթը՝ օֆսեթ:  
Տպագրությունը՝ օֆսեթ: Տպագրական 5.5 մամուլ:  
Տպաքանակը՝ 8 749:**

**Տպագրված է «Էդիթ Պրինտ» ՍՊԸ տպարանում:**

**ԷԴԻԹ ՊՐԻՆՏ**  
Երևան, Թումանյան 12  
հեռ.՝ (374 10) 520 848  
[www.editprint.am](http://www.editprint.am)  
[info@editprint.am](mailto:info@editprint.am)



**EDIT PRINT**  
12 Toumanyanyan str., Yerevan  
Tel.: (374 10) 520 848  
[www.editprint.am](http://www.editprint.am)  
[info@editprint.am](mailto:info@editprint.am)